



擷芳集卷之六目錄

節婦詩

古歛訥莽汪啟淑選

張上慧 二首

鄭氏 句

吳喜珠 五首

虞源 一首

蔣季錫 五首

彭貞 八首

潘淑清 句

王氏 一首

孫蕙媛 一首

鄧氏 一首

王儒姑 一首

李氏 一首

施婉貞 四首

談氏 一首

鍾令嘉 十三首

黃氏 一首

周蘊香 一首


杭澄 八首

陳淑蘭 三首

梁氏 一首

陳蕙芳 十首

袁氏 一首



擷芳集卷之六

古歙訥菴汪啟淑選

張上慧

江蘇嘉定縣人文學張銘之女也適陳邁早寡

著有炙香集

國朝練音初集上慧張氏能詩及篆刻文學銘女香谷陳邁繼室早寡家貧賴其子逸民授徒為養有炙香集

觀書有感

時光每恨逝如川骨月凋殘感昔年無限閒愁添病後
幾行衰淚落燈前兒攻儒業荒難就父積圖書散不全

一片傷心誰解惜後人曾否似前賢

和香谷

休嘆浮生夢幻莫言世事短長只看梅花竹影滿階明

月幽香

鄭氏

字里未詳附詩見高暉節母鄭孺人傳

句

仰止西歸不染身信手拈來自荷擔

高暉節母鄭孺人傳畧自移天後即從尊行吳母委念空門習梵唄喜施捨迨與蔣安人臨岐相輓有句云云此又孺人之達于觀化者也

吳喜珠

安徽歙縣人適環山方如麟夫亡矢志養姑教

子闡範有聲惜所著散失

方洪蓋吳孺人傳畧吳孺人者邑之枋塘人環山如麟公之淑配也孺人生而嫻靜母愛之如掌珠因錫名喜珠性至孝未笄之先會母疾剖股以瘞及笄歸如麟公如麟少嘗好赤松之術後以父際元公訟淮揚公亟向當事白之事雪而父歿公偕伯氏扶柩歸里門居喪一遵古禮族黨賢之崇禎辛巳徭狂而逸然自是而孺人之節孝彰矣無何舅與其夫子相繼謝世老姑在堂稚子在抱死固不易生又誠難當此之時非有特立不拔之守安能甘苦茹荼養其姑撫其子立名節于當時垂聲譽于後世哉順治丙申孺人以疾終後十餘年其子為傑嘗從家季遊予得稔聞孺人節概並讀其自述長歌溫令德托諸毫楮然予私心益敬者獨為其於甘

苦茹茶中夜必勤女紅篝燈訓子此其有功于
方氏甚大予故特著之爲後世之婦不幸而喪
所天負慙德而不
能訓其孤者勸也

粵城懷古

仙人不跨五年來碧海丹山次第開
沈氏談兵名將氣尉佗稱帝匹夫才
功留銅柱存冤魄骨掩花田轉劫灰
此是炎方冠帶國書生曾請棄珠厓
月明夜夜聽潮雞豈有珊瑚樹可棲
不嫁誰憐何泰女成仙真愧葛洪妻
鯉移炎海驚濤靜蝶到羅浮好夢迷
只有包公賤巖石五丁前此葬端溪

趙家塊肉付厓門王氣憑他海氣吞
誰念宮人皆北去可憐丞相尙南奔
奔江山豈許偏安藉珠貝堪爲貨殖存
莫檢新書添悵惘唾壺敲落玉釵痕

夢吹笛

殘燈微焰映窻紗羅幌風搖月半斜
夢裏不知愁老大猶將玉笛調梅花

秋望

秋山積翠碧雲高南望韓江路正遙
無數亂鴉翻日影斷蒲野水共蕭蕭

虞源

浙江德清縣人董某之室也以苦節聞

題畫菊

移種春苗愛護周
柴桑無主爲誰秋
寒芳甘抱枯枝死
羞見飄零逐水流

蔣季錫

江蘇常熟縣人南沙相國之女弟適華亭王圖
煒工書善畫著有挹清閣集

春燕詞

游絲繫日搖東風
銀蒜押簾春晝融
捲簾十二蕩空碧
紫燕飛去如梭擲
金刀涎涎嚙杏梁
掠水還誇滿徑香
微軀敢羨雲霄翼
且將牖戶綢繆亟
巧銜花片壘香泥
待得巢成自哺兒
畫簷故作兒女語
翠哥膠舌鶯聲舉
一夕涼飈攸團扇
海上冬歸春復見
乍可長從王謝遊
不尋儔侶昭陽殿

車遥遥

車遥遥揮駑馬紅塵撲面金鈴遲鞭呼侍有驅車者路
旁楊柳藏驛樓十里五里行不留蒙山之陽泗水北石
路險澀程途憂僕夫告瘁往復來行人多向黃金臺晚
月晨星競馳逐三萬六千雙轉轂車遥遥駑馬驕儂家
家近白蘋浦幾時歸去乘吳舫

春日書懷寄呈家慈曹太夫人

經春風雨興闌珊瞥見庭花暫解顏十載未歸虞仲里
終朝長對陸機山裁雲有句憑他巧賦雪無才信我頑
最喜板輿無恙在何當芳徑一追攀

侍袁太夫人夜弈

小院梧桐月滿時夜涼無事試敲棋婦姑原有相傳譜
莫怪今宵下子遲

家園新茶寄大兒興吾

纔交穀雨摘旗槍焙得春芽寄遠嘗畫省烹時須細品
可能比並婺源香

彭貞

字冰淑號筠山又字橫江女史江西崇義縣人
適上猶縣儒生蔡世浩夫歿矢志著有翠筠山

房詩鈔

袁嘉德翠筠山房詩鈔序略彭氏名貞字冰淑
號筠山幼負宿慧其尊人攀一授以唐宋人詩
輒能彷彿其規矩既適世浩閨中韻事人艷稱
之不數年世浩賁志以歿冰淑熒熒一人紡績
而外惟筆硯是務所作盈束輒隨手散佚其弟
立煌立煊為之彙集並採世浩所遺稿屬雪巢
弟詳加訂校
而授諸梓

送春次表弟蔡昌台韻

同是送春人不識春歸路鶯聲睨睨啼似欲留春住時
序一低徊人生泣朝露閉閣寂焚香獨坐有深悟

廢塚

昂藏誰家子葬此山之麓衣冠已如煙枯骨尙盈麓荒
草綠年年淒風號空谷清明暮雨復蕭蕭白楊花裏鴉
聲哭

賦得江春入舊年

扁舟過北固淑氣度初春野燒生微翠清流動遠垠岸
容殘臘盡節物舊年新倚棹孤吟處江空不見人

哭夫

悲風颯颯正斜曛天末秋聲不可聞生死自來皆有命
顛連未必盡如君飛殘紅雨心腔血愁絕青春嶺際雲

無主花神終夜哭園臺水榭草紛紛

全受全終古訓垂一擔枯骨强支持腸迴燭影鷄聲後

門掩山城木落時剪紙招魂惟有淚撫棺啼父竟無兒

可憐薄幔黃昏月戀戀詩樓不忍離

水曹清暇錄同司蔡主政奉均江右上猶縣人其
孀母彭太夫人秉性嫻靜雅善詞藻所著有翠筠
山房詩鈔其哭夫二章情真思切字
字肝肺中瀉出漫錄於此其詩云云

寒食日掃墓感賦

抔土於今隔九泉我來肅拜淚潸然棠梨花發青山道
寒食風吹白紙錢長劔已埋高士志荒邱空鎖綠楊煙
茫茫四顧愁何極落日啼雅下碧天

春閨詞

春日春晴花滿枝
眾芳開盡杜鵑遲
阿儂獨把柴扉掩
愁寂東風總不知

晴

綠槐青柳聽蟬鳴
日照窻紗喜早晴
十二欄干頻徙倚
薰風香送蕙蘭清

潘淑清

江蘇常熟縣人顧曉岳之室也乾隆初奉旨

旌表

句

老梅修竹相為伴
霜雪侵凌不記年

蘇州府志潘淑清常熟縣人顧曉岳妻年二十九夫與舅姑相繼歿無子女族人覬覦遺貲朝夕逼嫁淑清營葬後以其家讓族人子身依母家母歿居家廟中一婢相隨紡績度日常有句云云乾隆六年旌

王氏

貴州綏陽縣人張睿室也

絕句

自尤妾命薄如箋
初賦桃夭失所天
未老姑嫜還有托
綱常豈獨讓人先

貴州通志張睿妻王氏綏陽縣人幼聰穎通詩書年二十而嫁未期而夫卒題詩云云遂以身殉知

縣陳詢表其墓
曰張烈婦之墓

孫蕙媛

字靜婉浙江秀水縣人孫曾楠之次女適桐鄉
舉人莊國英早寡著有愁餘草

秀水縣志孫曾楠妻黃氏夙嫻經史伉儷聯吟
有冰玉集雪椒草諸刻曾楠歿賦蕉夢詠百首
詞極悽惋邑令齊旌其廬曰節文賢媛子涓璜
庠生媳屠蒞佩女蘭媛蕙媛俱能詩蕙適孝廉
慈溪學諭莊國英早寡著愁

餘草侍母同居世稱雙節
馮李詩繫孫蕙媛字靜婉德貞次女適桐鄉孝
廉莊國英蚤寡著有愁餘草詞工小令與介晚
勝爭

讀縫雲閣草賦贈沈夫人次姊氏韻

綺疏高擷補天樓銀榜新題藻靄流月姊靜窺三素粲
風姨不捲五華柔寫情妙句針同聖隱意迴文錦可酬
組練自知從研北絲絲葉葉幾殘篝

鄧氏

江西南城人舉人梅國棟之室也夫亡自縊死

江西通志梅國棟妻鄧氏南城人幼淑慧能讀
曲禮女史諸書事翁姑孝謹雍正甲辰國棟赴
公車客死河南鄧聞訃呼捨不欲生念夫棺未
歸一子羸弱不能舉兩喪暫起食拮据迎夫柩
營葬畢作絕命辭暨遺囑累千
言家人不及覺登樓自縊殉焉

遣悶

眼看時事欲銷魂寂寞餘香憶舊恩梧葉秋風寒翠袖

梨花夜雨掩柴門石榴慢染裙間色湘水惟留竹上痕
賦就哀詞悲楚客坐看明月到黃昏

王儒姑

浙江錢塘縣人

吳烈婦詩

烈婦姓戴氏新安人遷於杭歸吳集生之子錫錫以攻苦疾卒氏不食以殉遂安毛際可有傳

幽蘭開並蒂被摘心凄絕烈婦今再見冥冥來天闕寂
寂黃金花萋萋瑤草葉望之不可見見之榮榮香閨閣
通大義墮樓殊輝煌冰心若秋月烈志似秋霜彤管垂
億載芳名常耿光

李氏

湖北孝感縣人適熊贈君祚廷卽大學士賜履
之母也素嫻內則兼工書史守志教子惜未見

其全集

湖廣通志熊祚廷妻李氏孝感人少嫻書史卽知以禮律身及笄歸熊以孝敬聞值流寇起土豪藉讎生亂熊闔門遇害氏抱幼子匿荆棘中母族擁以去豪亦素聞其賢不復追長子適詣蒙師均免於難卽大學士賜履也氏痛不欲生念夫亡子幼忍死存孤木棉長藿手自經營嘗併日以食而課子最嚴日就外傳夜共一燈懈卽撻而數之母織子讀聲常達旦旣貴顯猶服布素卽繪帛亦澣補無算課女工如故接鄰嫗不啻娣姒初難作父兄皆歿氏親檢骸骨葬之哀感路人後氏子每晉一階卽大慟生平無歡笑容嘗語子孫吾家荷國恩已極然未亡人

分定矣

寒月夜作

宵分蟾影印虛庭為愛清光倚小亭慙對青山頭已白
悶看黃菊眼還青烟拖暮靄籠寒柳風漾幽池蹴細萍
不歎空閨多寂寞教兒猶喜有遺經

施婉貞

江蘇長洲縣人適吳翰章翰章早卒繼姑謀奪

其志不屈而死

蘇州府志施氏名婉貞東山人知禮節通文墨
年二十適金灣吳翰章越四載而寡無子氏忍
死奉夫遺命為立後又拮据墓其先三世繼姑
弗恤謀奪其志氏知終不免乃題絕命詞四首

於壁自經死檢討

張大受為作哀辭
七十二峯足徵集氏名婉貞東山人知禮節通
文墨能為閨中人講說孝經女訓持身端正適

金灣吳翰章事繼姑曲意承順翰章病將死謂
氏曰我父母未葬今無子日後誰為入土者爾

素苦無時不以此事為念而其繼姑弗恤也隱
然有居奇想百計勸之氏心如鍊石無隙可乘

越五載謀益甚氏知終不免乃題絕命詞四首
於壁自經死顧秀野張匠門兩太史皆詩以

哀之載諸邑乘雍正年間奉主入節烈祠
潘樛吳烈婦傳吳烈婦姓施氏吳縣東洞庭山

人年十九適金灣吳翰章逮事祖姑孝敬無間
言未幾祖姑及舅相繼歿姑張繼也愛其子因

讎視前子婦婦曲意承順宗黨稱之張性擊毒
陰為壓魅意為翰章崇其子忽一日暴疾卒越

旬日翰章亦亡而吳氏再世宗祧斬矣婦晝夜
慟哭誓一死既而念曰夫死不葬非義也三喪

未舉非仁也繼嗣未立非孝也負三罪而遽死

何面目見我夫地下以故隱忍不復言死事而繼姑張且謂其志可奪也張故有三女未嫁翰章歿時所遺猶足自給張乘間挈文券什物歸母家與婦絕往來于是家貲一空婦朝夕恒不繼不言也諸姑偵知憫而餉焉不得也兼以句讀授女徒支拄百端惟冀立嗣為營墓費如是五年往請于張張不為意惟勒改嫁益亟婦知事弗濟且終不克奉姑以終也因慟哭曰所以不死為未亡人者徒以墓嗣故今若是吾死久矣遂作書達父及翰章伯姆囑售屋營墓立所當為後者且囑母以我死故累姑書發自經死康熙戊寅十二月十三日也

葉張綏施烈婦詩序烈婦姓施氏名婉貞適金灣吳翰章章早卒無子其父母皆未葬施苦節自守為立後舉曩時拮据盡瘁而奪於繼姑積五載弗獲知己志終莫售也買席地為夫墓臨視窆歸則設苦褥於寢如殮具蒙被結吭死時康熙戊寅十二月十三日也先一夕作絕命詞四章粘之壁遺書白父及翰章伯母諄諄屬以墓嗣事冀成有志焉

楊錫綬節婦傳施氏小字婉貞姑蘇儒家女幼穎慧讀書能文詞長適士人吳翰章翁姑早喪繼姑張氏性悖戾氏事之惟謹年始十八而未出翰章病且死氏淚盡血繼亟請於張營葬莫併請為夫擇所後悉弗許但云若無子當早變計諸惟在我蓋利娶者貲也氏亦弗從張遂罄家所有悉歸其父母家以窘之氏集鄰童女為閨中塾藉館穀療凍餓者五年仍抗詞請張立後張恚甚遣人逼其嫁益急語益不堪氏知終弗濟乃作絕命詩四首有三喪我死誰人舉四代無傳鬼餒多之句又云今日從容長逝矣並無尤怨也無傷遂自經死時年二十三聞者哀之

顧嗣立讀弔洞庭吳烈婦詩絕命詞終山鬼呼可憐薄命遇嚴姑四年血淚知多少盡逐西風入太湖

絕命詞

夫天家艱薄命何蓋棺猶有事蹉跎三喪我歿誰人厝
四代無傳鬼餒多

首如蓬亂志如霜五載縗衣示未忘今日從容長逝矣
並無尤怨也無傷

柔縷高懸命卽殂此身久許殉兒夫遺言枉自粘閨壁
不識人心遵也無

一息甘休萬事完此心凜凜雪霜寒黃泉今夜居停主
應與共姜下榻看

談氏

浙江嘉興縣人適史義堅夫亡無子營葬畢遂

以身殉

蔣鳳起史烈婦傳略史烈婦談氏嘉興郡城人
史義堅之繼室也年十八歸史氏史祖父皆諸
生義堅亦讀書應童子試烈婦縫紉佐讀居翁
喪盡禮生二女皆歿為未亡人方年二十一哭
必昏絕誓從死其姑曰汝雖無兒女然有姪可
繼撫之以延汝夫一綫不愈於死乎義堅兄弟
三人堅歿時其兄有二子其弟婦趙氏方姪烈
婦乃勉從姑言既而應繼之姪與趙氏所生遺
腹子相繼歿烈婦死志益決以其夫尚權厝淺
土日夜號泣於其姑曰夫死不葬同穴無期未
亡人死不瞑目今雍正七年始克卜葬葬以三
月二十二日當是時烈婦之父已歿三年將除
服矣先葬前歸別其父靈出一詩以示兄嫂云
云兄嫂心異之將還家其祖母送之曰何時當
再來曰兒不來矣祖父母驚問漫應曰兒失口耳
本謂今年不來也既葬周其墓曰此處甚好在
此勝在家多矣葬之明日以金指環一付其姪
積鈞曰此汝叔臨歿時所授之物今以授汝吾

有小像藏某篋中汝謹誌之像故與義堅像同
日所畫也至晚手提熱水登樓婢從止之日我
將浴汝不必從浴竟整衣自經死死年二十五
距義堅死五年矣時雍正七年三月二十三日
也

示兄嫂

夫死失所天况無兒女焉若以義理論雖死亦當然

鍾令嘉

字守箴晚號甘茶老人江西餘干縣人贈君適
園蔣堅配也隨宦遊歷甚廣卒年七十著有柴
車倦遊集以子士銓貴封安人

臘日寄銓兒八首

北地寒威重憐伊客裏身音書差慰我貧賤莫驕人失
路皆由命安時卽報親師言當服習莫負誨諄諄

汝婦能承順無時離膝前居然兼子職久已得姑憐生
育宜佳氣平安似昔年傳聲語夫壻孤館減憂煎

汝妹依邱嫂幽窻共食眠穿針纔學繡識字不成篇閨
訓麗知聽童心未盡蠲歸期寧解卜時刻擲金錢

頻年思子泪前月抱孫纔憶汝孩提似原他祖德該啼
聲勞客試秀骨或天來歸日應過膝聞當笑口開

心情憐下第約略似前番官道應扳柳家庭已樹萱恃
才防暗忌交友戒多言結習還當掃新詩莫訴冤

力學看駒隙從游汝得師遙分五秉粟足供十人炊汝
友皆相念肥甘數見貽呼吾如若母問慰過時時
僕婢愛菘韭同鋤半畝園門關饒歲月居僻遠塵喧夜
火機伊軋家人樂笑言眼昏今益甚書帙懶重翻
夢爾天涯路肩輿往復頻師方爲講學客豈是依人駟
馬題橋志雙親屬望身而翁墳上草今已四回春

登太行山

絕磴馬蕭蕭羣峯氣力驕蒼雲橫上黨寒色滿中條返
轍當河涘攔車指驛騷龍門劃諸水真覺禹躬勞

送銓兒赴禮闈

半生常在別離間又整行衣厚着綿雙眼漸昏鍼線亂
寸心無着夢魂牽關河此去風霜遠骨肉何因聚散偏
不用登高望親舍金泥須早慰堂前

題白繡梅花詩圖

屈鐵孤梅莖古苔巡檐寒萼凍難開分明一幅鷺溪絹
繡出詩人小像來

泪珠成串上殘絨十指寒香敵朔風驀地停鍼魂欲語
梅花如雪照房櫳

身後君無封禪書迴文老去底須摹他時留與兒孫看
此是安人繡字圖

水曹清暇錄甘茶老人鍾太安人蔣心餘太史尊
 慈也壺德素著兼工文章贈公非磷先生常出遊
 太史生四齡太安人乃鏤竹枝為絲斷之詰屈作波磔
 能執筆太安人乃鏤竹枝為絲斷之詰屈作波磔
 點畫日教合之成字以慈母而兼嚴父九熊畫荻
 備歷艱辛所著柴車倦遊集不輕壽梓以示人子
 固請於太史因得選十餘篇入擷芳集然美不勝
 收漫摘數聯附載於此其遊赤壁云一官團練使
 兩賦好文章黃鶴樓云文字風猶壯江山氣不磨
 采石磯云山靜羣峯定江流萬派喧金陵云一片
 風流地千秋醉夢餘杭州云趙家孤屢托錢氏土
 先還揚州云那見人騎鶴空煩蟻慕羶真名句也
 韓夢周蔣母鍾太安人誅序太安人父諱志順籍
 南昌有高行是時贈公非磷府君以孝義聞於交
 遊間翁必欲得以為婿於是太安人歸於蔣蔣氏
 世居鉛山而贈公喜壯遊閱一年編修生贈公急
 友人之難遂赴澤州太安人就食於母家編修甫
 四歲即教之讀冬夜以衾覆下體解衣護編修置
 書日授稍假寐輒搖之曰醒可讀矣編修年十五
 熟九經始出就外傳皆太安人督課也編修成進

士官翰林太安人就養京師既而日兒才非適時
 者不如歸也遂告歸當事者爭延致主書院講席
 十餘年遍歷吳越名區而迎太安人於其地編修
 以行誼文學推重於時知編修者皆登堂拜太安
 人太安人顧而樂之編修亦樂得致其養也曰昔
 人以祿養士銓以學養猶昔所授于母氏者也贈
 公時家故窶空嘗於除夕大雪太安人抱兩月兒
 坐冷屋中括三錢市酒與贈公對飲贈公謂得毋
 戚於心乎太安人笑曰古人處此者多矣君丈夫
 亦動念耶兒即編修也編修嘗曰吾母達觀卓識
 非人所能及而造次必於禮士銓行年五十不
 敢冒利棄義蹈不肖之愆者誠安於母訓也

黃氏

福建建陽縣人王權室

絕命詞

常說死同穴於今問水濱團圓肯負約直向刀頭尋

周蘊香

順天遼東人太平營叅將周祺女

福建通志黃氏建陽王權妻權業儒而貧為父行役舟溺死黃遺腹不育隨自刎啟梳匣有詩云云

商邱縣志周蘊香太平營叅將周祺女本遼東人其父寓居歸郡幼慧穎知書父嘗呼為女學士九歲隨父官寧夏都司金某為其子聘焉已而金選粵東三藩叛路梗丁巳金以書來云為其子別娶請祺改擇壻蘊香聞之哽咽曰父母有成命尚何言一死以明吾志可也父母驚且慰之展轉自悲傷遂不食偃卧于牀不能起一日忽坐牀上索鮮衣勉強櫛沐臨鏡視粧從容起拜父母曰兒不孝負鞠育恩過午即長辭矣家人皆未信至時低首不語人視之死矣

秋夜

霜臯落木正無邊塞鴈南征九月天讀罷葩經忘夜午

牕籠殘月抱愁眠

杭澄

字清之號筠圃浙江仁和縣人杭太史世駿之

女弟也適趙萬暲早寡

董浦杭太史亡妹吟草序略妹為先府君次女母王太孺人即吾母女弟也甫毀齒即知嚮學未嘗就傳亦未嘗問字於父兄聞弱弟誦讀經書則默記試效其聲以識字辨色而興維誦琅琅聲殷戶外稍長輒效余為制舉之文旋棄去壹意為詩風格蒼樸無脂韋之習無金粉之氣蓋夙成也歸於趙聳曰萬暲恂恂温克雅相器重閨房唱酬而妹才較勝聳以几案才參人幕事恒他出青燈苦雨望遠懷人皆妹攢眉覓句時也余赴召之京妹寄詩有有金買書不買田語遂為吾一生實錄吾姻親有令直隸之新河者招萬暲往妹以無子偕行余官京師無從尼

也而妹尋悔遺書酸楚然有唱和遣日亦安之矣無何轉客慶都而萬暎以痢疾卒於官舍妹聞驚慟欲絕伶俜孤苦挾一小婢一老僕遞其棺以歸里艱難險阻備嘗矣依母以居驚魂稍定一往之詩皆半愁血淚悽心寒魄之語也余被放歸田舊居不足以容石友方君滌山割宅讓余滌山有女芳珮有頌椒咏絮之才妹來省母輒相見歡甚自是唱酬無虛日家有女甥女姪妹親指授詩律藉以梳雪結滑消磨時日俄而兩母棄養芳珮從其壻遠宦京師甥姪漸次出閣益復無聊病不可

藥神離形蛻卒於吾家
 閨秀方芳佩湛堂書幃詩跋杭夫人名澄字筠圃堇浦太史女弟性貞靜嗜讀書太史鄴架甚富成資其涉覽間為詩文自然合矩適同里上舍趙萬暎高才積學蜚聲藝林閨房唱酬詩學更進然深自韜晦從不出以示人即愛才如太史未之知也上舍文戰不利從事筆耕幕直隸之慶都時夫人同懷弟世瑞外舅令新河夫人因偕弟婦北上聞上舍抱病垂危亟往視星馳

數百里值狂風驟雨衣裝盡濕比至署上舍已逝一慟幾絕思以身殉回顧繼起無人且時當盛暑于是忍抑勉為部署衾擲含殮婦而兼子職勺水不入口死而復甦者五晝夜復竭蹶扶柩關河險阻跋涉維艱抱病持脩極困苦七易舟船越三閱月始抵里門緣肢體受濕加之哀慟辛苦遂成風痺痼疾夫人無子女上舍故寒士初嗣叔父後叔父亦年邁攜一妾幼子以居杜門不出同懷兄萬曦挈眷居淮陰夫人無所倚藉歸母家依諸弟守志焉然疾雖作尚能步履間一歸省舅氏修子婦禮時趙氏三世八棺未營窀穸夫人念舅老伯遠子姓稠替恐淹露日久竭力圖維丙寅春得地鷄籠山麓書達伯氏于是秋卜葬憫老婢貞義亦瘞于壙側勞瘁悲痛疾益深固且矢志不欲居人世因高堂戀戀姑為遷延茲則筋骨挛拘發為流注不能踐地惟坐卧呻吟于床第間與余詩文往還憶自癸亥歲太史奉太夫人僦居舍間夫人時來定省承念通門之誼誨導殷殷相得無間固請其著述始出此作及書幃詩見示屢思奉和

恐初學貽誦效輦因循未就先將原作錄入拙稿並附書幃詩窺一斑可知全豹卽夫人之清心逸致亦見大凡耳尙有吟草偶存二卷俟徐購付鈔他日尙有力當代刊問世余因之有感矣昔大家貴嬪與孟堅太冲彪炳千古令暉令嫺並明遠孝綽棣萼聯輝今太史之文章氣節超乎班左鮑劉夫人亦不在惠姬諸人下顧沒沒無聞不獲媿難兄傳不朽豈得名亦有幸不幸與且境遇之榮悴又視昭芬輩判然乃知天之阨才雖巾幗亦難免也

詠蘭

猗歟芳蘭此焉游處香本王者其何可語當門恐鋤入室誰與或采其芳將以佩汝

壽母詞

仁壽古聖語今益信其然吾母有盛德高行媿昔賢紛

華屏勿御嗜好簡編丁年挽鹿車偕隱厲貞堅克相先君子養志怡林泉旣復念同氣安忍各一天猗歟連理枝同歸斯慰焉效彼皇與英共調琴瑟絃恪奉堂上姑甘旨罔所愆內外諸姻戚恩禮相周旋貴賤殊一致至性無黨偏吾父先捐棄中心恒悃悃教子慈且仁殷勤師三遷閫範自可法徽音難具宣今歲屆古稀矍鑠勝少年兒孫繞膝下萊彩何翩翩仲兄蘊經術對揚聖主前恩綸來帝闕丹詔五色鮮于以答慈惠褒德福始全癡女愧無似陳詞徒彣彣寸草雖有心安報春暉妍雙萱並秀挺亭亭北堂前長跪獻壽酒願祝如增

川

書湛堂帳幃

嘗聞不朽世有三緬維立德何其難其次立功與立言
得一亦足泯詎慙男兒事業差可數不學爲文便爲武
武如李將軍彎弓拔箭異域成大勲文如司馬卿含毫
給扎擿藻登天庭得時而駕作霖雨否則且隱南山霧
用可行兮舍可藏屠沽耕釣安其遇卓哉夫子清時英
襟期矯矯何可馴抑鬱磊落歲復歲便便腹筭難療貧
隱居不得安巖穴奮袂還爲四方役天涯聞說盡名流
西園無忌能延客揮手忽辭鄉國去片帆高拂江天樹

閨中刀尺思悠悠夢魂回到雲飛處君不見漢代梁伯
鸞攜手出秦關五噫之歌滿天地至今高節滿世間又
不見匡廬峯成都市丈夫何必拘行止溪山勝處足流
連適意便可終安矣十幅生綃供卷舒寫霧圖雲聊復
爾夜邀朗月鑑襟懷晨聽流泉濯塵滓雲山疊疊江水
深馳書千里索我吟我非頌椒銘杖之鴻才聊奉數語
君勗哉持身貴縝密良玉以比德我知君子心其儀必
如一懷才會當有遇合壯志豈能長隱逸劉琨之雞祖
逃鞭願君努力時勉旃或可致身酬夙昔當使功名異
流俗他年拂袖歸田廬買舟日泛西子湖西子湖頭風

景好一邱一壑堪偕老詩成爲君書此幃時時常得共
光輝

除夕

暮景飛騰急崢嶸逼歲除年華今日盡病骨幾時舒衰
髻隨霜白寒燈伴影孤長眠泉下客此夕定何如

春日寄懷湛堂

晴烟漠漠柳絲絲腸斷春江是別時千里相思兩行淚
三年光景幾篇詩生涯似兔初營窟踪跡如蟬不定枝
却怪天涯久留滯何年得遂鹿門期

舟泊淮陰晚霽

淮陰城下郡門西草徑荒涼客路迷村落幾家茅蓋屋
野田一帶水平堤櫓聲住處歌初起樹色濃時鳥亂棲
爭似故鄉風景好兩峯三竺與雲齊

燈下

不覺流光速羈游情易傷一燈空耿耿愁與漏俱長

秋海棠

寄跡牆陰畔相思淚點紅芳心無處訴寂寞對西風

夏日移榻讀書草堂

泠泠竹韻響南牕六月清寒枕簟涼不識人間有煩暑
悠然高卧近羲皇

陳淑蘭

字蕙卿江蘇江寧縣人適庠生鄧宗洛後宗洛以失館抑鬱自沉於池淑蘭時即欲殉及繼子

定宗洛葬仍雉經著有化鳳軒詩稿

陳烈婦傳江寧有烈婦曰陳淑蘭庠生鄧宗洛之妻也祖垌能詩淑蘭幼侍側即學吟咏鄧生雖才遜于淑蘭而性端謹床第間搜句徵典賓賓如兩學子然家居萬竹園余觀竹過之淑蘭褰簾請見曰讀先生詩疑是古人今幸同時願為女弟子出其所作清婉處故唐音也居恒善繡嘗繡兩絕句于吳綾丐余詩序余作駢體七百字以應今年鄧生失授館所意鬱紆不治六月四日投池死淑蘭驚哭嘔血夜即雉經翁救之蘇淑蘭亦悔惜曰吾過矣翁在堂夫柩在室繼嗣未定非吾瞑目時也越半年族人立嗣子霖篋曰為宗洛引轎淑蘭有喜色家人覺其哀

聞鐘

日落又黃昏閉目匡床坐聽得一聲鐘萬古塵心破

金陵感舊

玉樹歌殘不忍聽六朝金粉半凋零而今只有天邊月曾向陳宮照後庭

寄和會書屋

小院清香撲面來拋針幾度立蒼苔幽蘭亦有懷人意素蕊微含不放開

減禁防稍疎十月二十日遣女奴淪茗掩扉而縊端書几上云有子事翁吾心安郎柩既行吾不獨生矣家人闢戶入視墨未乾爐中告天之香尚濛濛然有餘烟也編其詩得若干卷

梁氏

浙江新昌縣人適同邑王茂芝茂芝卒氏矢志

守節

示志

裙釵自是一孤身節比松筠不改真父母豈知情誼重

願將完璧報良人

新昌縣志王茂芝妻梁氏生一子甫三歲茂芝卒氏誓死不二父母微諷之輒大慟入粧閣書衣衿云云自是勤紡織供姑甘旨姑傷足痛楚氏扶掖撫摩指拭臭穢歷十餘年始忽起行坐如舊人以

為孝感焉

陳蕙芳

江蘇長洲縣人能詩畫浙江鄞縣人蔡天石遊

幕吳門慕其名納為造室未及三年而寡誓死

不嫁著十孤詩以見志哭夫喪明督學帥念祖

表其閭曰松竹雙清

十孤詩 小序

氏系出太邱家居滸墅追隨蓮幕良人嫁得中郎冷落蘭闥薄命悲同衛女署紅鴛之牒未滿三年歌黃鵠之詞尙餘一死爰賦詩以見志聊假物以抒懷茹蘗飲冰竊自附柏舟之作拈毫弄墨豈敢誇柳絮之才

從來聚散不勝嗟日暮殘雲隴上斜應是舊山歸不得

獨留孤影在天涯 孤雲

幾許輕涼透素襟月明庭院夜初深人間莫嘆姮娥寡
一片清光照古今 孤月

亭亭獨立羨孤松長向顛崖寄舊踪無數風霜無數雪
一生義不受秦封 孤松

歷盡冰霜節不磨淚痕多少染湘娥一竿截作高樓笛
吹徹陶家黃鵠歌 孤竹

流螢一點自徘徊雨細風吹莫漫猜猶憶綠窗人靜後
與郎曾照讀書來 孤螢

故園春色已無花瘦影匆匆日又斜何惜抱香枝上老
向來夢不到隣家 孤蝶

塞外秋高隻影寒空閨愁思正漫漫西風夜月江南路
錦瑟從今不忍彈 孤雁

繫得紅絲一縷新半天疎雨社公春尋巢不逐雙飛侶
為戀堂前舊主人 孤燕

夜深無語對銀缸細雨疎風冷透窗憑仗餘光耿相照
素帷留得影雙雙 孤燈

西風颯颯漏沉沉歷落還聽空外音用盡閨中如許力
更無人寄塞垣深 孤砧

袁氏

浙江仁和縣人適沈某

責郭巨

孝子虛傳郭巨名承歡不辨重和輕無端枉殺嬌兒命
有食徒傷老母情伯道沉宗因縛樹樂羊罷相為嘗羹
忍心自古遭嚴譴天賜黃金事不平

隨園詩話姑母嫁沈氏年三十而寡守志母家余
幼時即蒙撫養凡浣衣盥面事皆依賴於姑姑通
文史余讀盤庚大誥苦聲牙姑為同讀以助其聲
嘗論古人不喜郭巨有詩責之云云余集中有郭
巨埋兒論年十四
時所作秉始訓也

擷芳集卷之七目錄

節婦詩

古歎訥菴汪啟淑選

程氏句

王湘波 五首

徐氏 一首

孔繼孟 四首

周氏 一首

鄭徽柔 一首

方琬 五首

范倩仙 一首

金順 八首

程天麟 一首

李氏 一首

沈飛霞 二首

陳氏 二首

顧瑞麟 四首

李氏 三首

許德瑗 六首

王氏 四首

陳守範 十二首

汪氏 一首

范景姁 一首

張雲 六首

許在璞 五首

沈氏 一首

陳瓊圃 四首

擷芳集卷之七

古歛訥菴汪啟淑選

程氏

江蘇江寧縣人適曹仙儔兩載卽孀撫遺腹子成立

句

今日呱呱當日血寒燈隻影賦招魂

此兒解事如能早同穴何難速訂期

楊錫紱節婦傳程氏江寧人年十八適曹仙儔未兩載而仙儔死氏遺娠越月誕一子氏流涕賦四截有句云云聞者嗚咽酸感氏翁死力貧殯葬爲文祭奠語更沉痛曹氏無親屬氏乃依母家十餘

年不聞言笑未幾而孤殤母家密爲防護氏乃得不死今守節二十六年年四十五歲

王湘波

浙江仁和縣人教授璞完先生之姊也幼耽韻語適永州司理張士箴兩銘中年而寡絕口不談詩文以故著作甚尠

萍鄉道中

水村山店總離情愁聽千林杜宇聲賴有不殊鄉國處
兒啼犬吠與雞鳴

小有天園

宛似仇池愜帝心琴臺首尺樹千尋明湖多少承恩

處不及斯園雨露深

處處亭臺儼畫圖巖巒窈窕徑盤紆若耶人遠如相對
秀色堪餐邁兩湖

閒園寵錫嘉名後巖谷生輝瑞氣多更喜羣賢賡
御藻一時秀句滿山阿

御爐煙靄尙氤氲我亦支筇暫入羣從此名山懸寶
翰桃花香散墨池雲

徐氏

江蘇上海縣人徐文定公孫女王昊之室也

素心蘭

國香言格不言姿况有如冰似玉枝我是終身端素女
相逢相對兩相知

孔繼孟

字德隱浙江桐鄉縣人適烏程國學生夏祖勤

青年矢志奉 旨旌表著有桂窻小草

馮浩節孝夏母孔孺人傳略夏節母孔孺人系
出曲阜世居浙江桐鄉父康熙己丑進士解州
知州諱傳忠學者稱恕甫先生余舅氏也母宜
人朱氏節母其季女也幼淑順柔嘉讀書明大
義及笄歸烏程國學生祖勤字稼知稼知美秀
多文節母四德具嫻兩姓尊長有珠聯璧合之
譽稼知制藝得名家風骨視科第直俯拾地芥
一不得志悲憤歎吃遠致疾節母以詠絮才怡
顏柔聲時慰解之盡傾奩資助醫藥疾革籲天
祈代而竟寡節母年僅二十有八生子耀曾方

五齡呼搶號慟死數四既而泣且起曰舅姑
老矣無他子一襁褓孫吾殉夫死父母及藐孤
復誰之責也乃強自抑哀奉舅姑倍恪順鞠護
耀曾周至耀曾早充縣學生文行重士林固心
谷之德教亦半由母訓也節母事稼知病時徧
搜閱醫家言因粗通其術歲癸亥挈耀曾侍姑
徐孺人赴麻城耀曾傷寒舟次無良醫幾殆節
母細驗天時探病由察其進退酌方飲之而愈
後耀曾屢疾皆然從姑理內政心谷以為能既
解組授以家事鉅細等畫皆獨任之疾徐豐齋
動與理協心谷廉俸之餘無多稍久已罄不大
形匱乏惟節母善調劑焉姑患風疾侍湯藥年
餘不解帶後先居姑舅喪備盡哀禮乾隆三十
一年邑士民條節孝事實請於 朝得 旌如
今年六
十有四

傷逝

腸斷思君子悲哉逝水流溫文嫺禮樂慷慨熟春秋長

嘯劉琨壯深心賈誼憂玉樓天帝召千載恨難休

白秋海棠

慣向西風展素粧亭亭小立玉階旁柔枝合綴湘妃珮
弱質羞薰賈女香月底朦朧迷蝶夢雨中寂寞斷人腸
更憐零落深秋裏幾處殘叢傍夕陽

柳絮

玉笛聲中未盡芟尙教飛雪滿塵凡悠悠若夢迷仙蝶
漠漠如煙鎖翠岩散去天邊雲影合浮來水面鏡光涵
謝庭飄颺沾險筆陳苑輕狂拂舞衫嫩莢同鋪鶯亂啄
殘英共踏燕忙銜餘情不斷離亭畔猶自隨風送客帆

送春

落花無迹怨春歸寂寂空枝舞蝶稀惟有呢喃雙燕子
殷勤依舊傍簷飛

周氏

江蘇淮安府人諸生周秉正女適王啟正詳見

詩註

題衣帶

此身無告到如今世上人看也不禁何如尋箇無常路
免得公姑苦掛心

淮安府志周氏府學生員周秉正女王啟正妻也
夫貧變奩爲生計割股療舅夫大疾藥餌無功割

股不救氏慟幾絕中夜始甦請其父殮之夫亡後
飲食益不給日夜針指盈案三年服闋請姑覆墓
暮回仍喪服閉門縊死留詩於衣帶云云末
附云某物遺公姑爲餬口某物變賣爲殯費

鄭徽柔

字靜軒福建侯官縣人固安令善述女知府鄭

荔鄉先生之女兄也少寡守節四十餘年乾隆

年間旌表

福建通志鄭徽柔固安令善述女適監生陳日
贊日贊病瘵氏割肝以療後日贊卒矢志撫孤
苦節四十餘年氏能詩遭家不造皆悲哀愁苦
之音與弟方城方坤多所倡和著有芸窻蛩響
集方坤序而傳之時年
七十有八乾隆間旌

賀人重宴鹿鳴

手執異人斫桂之玉斧足蹈大海駕柱之鼇頭路旁觀
者互嘖嘖是何慘綠年少真風流中年作宰不稱意牛
刀小試高人羞拂衣歸里且却掃溪山詩酒此外復何
求以茲葆光養性享大壽鬚眉如雪明雙眸 朝廷有
詔待國老大袍都紵杖則鳩與新郎君旅進退重聽鹿
鳴之呦呦

香草齋詩話乾隆壬午予年八十復膺重宴鹿鳴
盛典諸戚友及四方郵寄各贈言金薤琳琅盈
箱積帙予愧不敢當而閨秀諸什亦
有可傳者手執云云鄭靜軒句也

方琬

字宛玉號少君福建莆田縣人諸生林樹聲之

室也著有斷釵集

蘭陔詩話少君博極羣書事姑至孝姑病祈天請代有詩誌感云代死祈茲夕哀忱冀達天頻將血淚拭恐動見時憐年十九喪夫冰霜自矢青燈黃卷自課其子卒成名士遺藁惜已不傳

拜父墳

地下知還否傷心一拜遲積書誰可讀生女亦空悲草色秋霜變苔痕春雨滋無因攀樹哭蕭瑟斷腸時

戊子避亂舟中寄弟

野樹鳴蟬咽未休蓼花蘋葉晚來秋干戈滿眼驚殘夢風雨傷心逐去舟喪亂相依吾弟在艱危無奈老親憂更憐宿草青青塚寒食新烟望裏愁

寄從姊珮

為問雲中雁新書寄若何可憐裏裏字已是淚痕多永晝悲清瑟輕寒怯素羅一從相別後畫閣忍重過

春感

風雨前窗過殘紅逐水飄一枝春寂寂留伴可憐宵

看月

烏鵲驚寒兩兩過梧桐一葉已辭柯可憐此夜清輝滿偏照愁人別思多

范倩仙

字貞女湖北蘄州人詩見蘄州志

示嗣媳董氏

蘭閨獨坐轉淒涼一縷紅絲恨未忘今日冰心仍是昔
到頭終入女兒行

金順

字德人江蘇吳縣人適烏程中書汪曾裕夫亡
守節後以哭姑嘔血而卒著有傳書樓集

寒甚

雨住風尤緊雲陰寒更嚴預占天釀雪時見雀爭檐獸
炭煩添火蝦鬚鎮下簾餅梅自無恙香氣尙留甜

柳

細柳千絲發寒烟一抹生小橋陰乍合官道雨初晴翠
帶娟娟淨黃鸝箇箇鳴撫心松柏在不羨爾輕盈

題管夫人畫竹

墨妙由來數仲姬閨房靜對寫風枝王孫若解凌霜節
合署鷗波老畫師

梅花絕句

數點寒英雪外明獨傳高格歲崢嶸最宜鐵石摹枝幹
底事腸迴宋廣平

對月漫興

重簾初捲篆烟香冷淡銀蟾皎潔光秋月果勝春月好

次寥天氣夜方長

水晶宮外色蒼茫七寶修成玉宇涼徑欲乘風天際立

廣寒深處聽霓裳

金波是處瀉盈盈望裏烟雲畫不成知已劇憐青女獨
寒螿更與奏商聲

一片琉璃碧海橫倚欄偶爾意難平嫦娥縱使貪仙去
肯就人間竊藥名

程天麟

福建興化縣人

任母吳太君詩

苦節人樂稱不知苦之程破鏡年二十母與我同辛鉛
華夢弗御檻竹血長凝紡鴟供甘膳丸熊訓遺經潔牲
虔鬱祭壘土大墳坐飲冰到垂白雙鷓幸知名子婺砥
而石母德瑤與瓊砥石微光黯瑤瓊寶氣榮焰迴神顯
異澄鑿井昭靈鄰不戒于火焚數十家延及太君之室
太君守兩世殯棺不肯出忽風返火滅
家有古井忽清
測見底者七日桂子看飄月蘭孫喜列楹繡使陳芳躅
彤庭大表旌景行何以慰清歌寄玉琴

李氏

湖南新化縣人幼孤聞兄讀書自知向學適吳
承柴夫亡殉節

絕命詞

自古爭稱令女賢輕塵棲草動人憐孤凰心已成灰久

尚忍粧臺整舊鈿

湖南通志吳承柴妻李氏新化人甫三歲父亡隨兄奉孀母楊氏附居舅氏家聞兄讀書氏默聽即能成誦舅氏異之教以經史悉解大義及適承柴事翁姑甚得歡心承柴病氏百計調護衣不解帶者數月籲禱願以身代遺腹生一女不育翁姑欲奪其志卒不可歸依母氏常繡一帕曰吳門李氏密藏之既終夫喪竟自經死掛繡帕胸前作絕命詞云云

沈飛霞

浙江桐鄉縣人適石門吳起代早寡著有繡餘

殘稿

柳

淡淡鵝黃細細絲舞餘時困小腰肢隋堤春色初連水
灞岸晴光已滿枝弱絮籠煙鶯語溫柔條過雨燕穿遲
曉風吹醒三眠未詎望章臺妬翠眉

題畫

野水平橋方日暮山人倚杖來還去試覓春光在何處
落花茫茫鳥啼樹

陳氏

湖南益陽縣人適鄒代理生子甫一歲代理捐
館念晁未能斷乳強生年餘卒自經殉

夜聞孤雁

深秋白露下三更枕上遙聞一雁聲舊侶不知何處覓
可憐清夜獨哀鳴

絕命詞

心頭已是灰眼底空流血不作未亡人與君同一穴

湖南通志鄒代理妻陳氏益陽人年二十二于歸生子勳位甫一歲代理臨危相對涕泣氏曰夫子以母老子稚妾少為慮耳母老委諸叔子稚托諸姑設有不諱妾當相從于地下耳代理沒念兒方待乳未即死而志終不改曾於秋夜聞孤雁賦云云錄諸靈右抱其子朝夕泣奠未幾有勸之改嫁者陳艷然曰我所以不死者為幼之故今已歲餘吾志可行矣是夕自經年二十五歲有絕命詞云云

顧瑞麟

字六昭自號用里畸人江蘇甘泉縣人適任生
著有焚餘鐫

張存仁焚餘鐫跋焚餘鐫六昭夫人詩也夫人
邦東望族幼能文章工繪事女紅稱絕而尤長
於詩笄年歸任氏五年而孀撫孤又五年而殤
或恤其少勸之改適里中顯貴欲與締姻夫人
不但志矢柏舟而視殞其軀真不啻若輕塵弱
草焉平時吟咏甚富自為未亡人悉取存稿焚
去後三十年幾甘心于茗香繡佛中矣噫有人
如此忍令其泯滅以終耶其尊人與余友善得
未燼數章余閱其才傷其遇嘉其志敬為之梓
云夫人姓顧氏諱瑞麟六昭其字也號用里畸
人

秋夜

掛支集 卷十
雨過風初靜天高雲自流砌蛩吟午夜街鼓報三籌寂
寞空樓冷蹉跎久病秋何當今夕月渺渺向人愁

村居

門掩垂楊野岸東小橋曲折一蹊通青山隱隱浮螺黛
流水泔泔浸玉虹得趣花香鳥語外會心初日暝烟中
幽居頗與閒相適榮落何妨付化工

雨中荷花

空濛細雨暗重湖翠蓋紅蕖望有無已辦藕香殘作粉
忍看清淚迸如珠

秋宵有感

細雨斜風滿院秋海棠花老戀枝柔無情青女還相妬
砌冷苔荒總是愁

李氏

河南安陽縣人高唐州州判李黃次女適黃明
經履平性寬洪喜怒不形於色精岐黃輕財樂
施著有詩集

杪冬淇邑感懷

寥寥書館客中居况值窮冬百事疎薄枕憶家千里外
寒窻兀坐五更初飄零木葉侵幽徑落寞霜華滿敝廬
時繫寸心歸未得殘燈挑盡獨躊躇

夜聞二子讀書

節屆清和夜氣涼蟾光皎皎映書堂吾兒頗奮螢窗志
惜少熊丸教子方

思親

秋風拂檻氣蕭森兀坐紅窻思轉深烏鳥尚然知反哺
吾生却愧不如禽

農隙筆談河南安陽縣人高唐州州判李黃次女
李氏適黃明經履平能詩善鑿痛父無嗣迎養十
餘年因父有軒名得得遂以繼得名其室以志不
忘有繼得軒思親詠其詩不甚佳然孝思可嘉慢
識於此孝父名齋得得連膝前無子紹薪
傳女兒欲報劬勞德繼得烏私達九泉

許德瑗

字素心號竹軒福建晉江縣人善丹青適何某
夫亡守節著有疎影樓稿

芍坡汪新疎影樓稿序蓋聞門風綺麗曹則大
家品藻芳華左惟嬌女書生不櫛競誇名闕于
汝南才子掃眉樂誦清芬于樞內然而柏舟致
詠衛女傷心黃鵠興歌陶姬苦節從來福命大
抵相妨繫惟許氏毓質儒門鍾靈海嶠趨庭他
日伏女則口授三墳毀齒童年令嫻則名高諸
姊銀釭夜暝酷摹屈宋曹劉繡闥春明兼寫荆
關董巨泊乎蠻天隨宦遲愛日于珠江遂爾官
舍齊牢締同心于花縣參軍新婦喜兩美之相
遭鴻案張眉誓百年而偕老孽花殘兮裁句擅
彩袖兮揮毫固知南國有佳人居然獨立還羨
東方之夫壻允矣比肩夫何月不終圓天偏多
憾共命之鳥孤棲連理之枝忽折鼓瑟鼓琴之
會聲斷鳴弦淒風淒雨之辰影沉破鏡况復椿
萱並謝日韜彩以無暉蘭玉旋凋蓮抱心而更
苦啼猿盡血淚竹成枯此則韓娥絕唱聲因激

楚而彌長劉女善懷詞以悲哀而益至也僕觀
風聞海問俗榕城夙仰清操雅欽鴻製矢貞心
于冰雪臺是懷清挹秀氣于門楣風貞林下傳
來好句足敵江南色絹之工諷遍瑤章盡洗北
里臙脂之陋加以劇言苦句永嘆長號讀未終
篇淚將盈手想屑瑟于蕭晨吹殘故籥尋寂寥
之知已伴結寒梅爰綴俚詞用題新咏此日姬
姜憔悴片玉誰收常璩之編他年彤管馨香兼
金定重雞
林之價

記事珠

小樓獨坐感逝傷離不覺廢書三嘆以淚和墨
成此長歌聊當一哭云爾

年來閉戶深存拙半卷殘書自怡說偶餘一慨於所天
歸去何年得同穴忽驚世態生波瀾觸起愁懷轉嗚咽
鴈鴻飛不到重泉無限哀情祇自說憶初隨宦嶺南鄉

萱花椿樹喜高堂兒來閩海攜輕棹官閣和鳴賦鳳凰
鴻案相隨吟二南不諳紉組每生慚聽君讀史添金鴨
露濕花稍月已三風雲世事原難測瘦沈腰身病魔逼
海氛瘴雨不相宜地僻難尋扁鵲醫魄散魂飛期有望
生離死別不勝悲一病堪憐扶不起熒熒此身無所倚
傳言天上玉樓成天折青春廿六紀結禱屈指一霎那
變換滄桑喚奈何玉奩劈破菱花鏡淚血斑斑嗟薄命
今朝伯道竟無兒四載蘋蘩莊且敬高堂親老鬢成絲
辜負深恩朝夕悲三齡變女看阿保靈几添香知拜禱
也知問字學吟哦賴汝晨昏慰煩惱吁嗟作此未亡人

偷生因念畫堂親從今寡鵠孤鸞泣相約梅花作比隣
阿兄有子鳳毛器坦我東牀遂所志藉此聊消一綫愁
不料還爲天所忌如珠一女忽痘殤命舛又遭雪上霜
返魂香冷空垂淚續命絲無枉斷腸阿兄含淚攜嬌女
爲憐岑寂吾與汝喜兒賢孝性端莊燈前夜夜勤機杼
萍踪東粵遇仙真胡氏聯芳喜宿因子許門楣成眷屬
又訂金蘭爲手足梅花開候月明時花下敲詩相和續
忽聞老父掛冠遊惆悵分羣萬斛愁五羊城上雲遮嶺
一掉離情到福州舅氏吳門眠食好先姑早返蓬萊島
愁人到此斷肝腸且侍椿萱共寒燠何期父母又仙遊
鞠育劬勞痛未酬每爲命薄屯遭女好景常教老淚流
病懷愁緒添悽楚親去哀兒更失所是因是果兩無知
哭向蒼穹爲我語嚴親宦海囊蕭索過未封胡窮落魄
友愛將予數畝田略充餽粥供朝夕爲君立嗣承君後
教以詩書求益友只愁不克負家聲殘生深愧爲君婦
不逐金釵遊翠陌不歎花晨與月夕布裙椎髻頗自如
靈府清虛似白壁一椽棲止兄弟家姊妹頻過坐月斜
話來舊恨添新怨揮淚濡毫腸寸斷寫此詞名記事珠
滿紙巴詞如草蔓

歸猿洞元韻

遙望青山畔嘗留萬疊雲自從歸古洞不復憶羅裙露
滴松花落風來蕉葉紛仙踪惆悵遠清磬月中聞

酬胡卧雲姊見贈元韻

年來無夢到塵氛祇有情牽向卧雲楊柳風微春試茗
梧桐月冷夜論文莫言回首東西別且喜聯牀上下分
擁卷每嗟知己少半生深慰得逢君

新秋書懷

世態浮雲送落暉萼鱸雖美與誰歸半林暮雨蟬初噪
小院梧桐葉始飛愁到濃時醒似夢病來好景是還非
餘生生計知無那漫向西風聽擣衣

畫梅寄石蘭姊

傲骨生來耐歲寒可憐零落惜香殘當年松竹清陰好
百匝巡簷月下看

楚天望斷鴈行分消息沉沉渺不聞詩思暗香和月冷
五更夢覺便思君

句

文章退之筆詩句玉溪篇盡榜重開日蟾宮再拜年

香草齋詩話乾隆壬午予年八十復膺重宴鹿鳴
盛典諸戚友及四方郵寄各贈言金薤琳瑯盈
箱積帙予愧不敢當而閨秀諸什亦有可
傳者如文章云云許石泉女德瑗句也

王氏

江蘇吳江縣人適震澤庠生張嘉瑾

茅應奎絮吳羹宣城孝友古處克並仲兄岫瞻亦見稱于揚園先生節媛年少而孀守節自誓動必以禮治家甚嚴後謀葬夫族姪受奇捐地助葬墳成尋歿詩雖不多亦可追踪薄少君矣

哭夫廿六首

選四

杳杳紛紛戶外傳素車白馬盡名賢猶疑講習如曩日忽感存亡淚似泉

夫歿半年連子失每思泉下斷愁腸幸分仁粟供朝夕哭奠靈床誼敢忘

兄弟傷予病勢危詎知吾意悔亡遲祇因未葬還偷息窆後纔為畢命時

憶自初旬拆鳳凰爾時我亦病膏肓遲迴終欲隨君去豈肯貪生作未亡

陳守範

字靜閑浙江海寧州人兵垣存理公長女也適錢塘諸生顧宜曾結褵四載而寡能制舉文著有靜閑遺詩

陳皖永讀從姪女靜閑遺詩志悼詩霜霰侵凌松柏姿那能留得歲寒枝老人怕讀傷心句正值愁多難理時羸臥空閨病不痊淒涼有淚日涓涓多愁多感無從說不欲人憐祇自憐深掩孤幃泣歲華冰霜清節共稱嗟雪中梅尚無心看何況春風桃李花巾幌遺詩託藐孤因憐癡小累君姑金環珠飾緘封密意比兼金淚比珠言餘顧復定如珠矢報恩環意自深斷句無多

留淑德孝慈已見一生心得報春暉盡孝思倡
隨二館傍嚴慈舅姑帶水常崇念修隨殷勤奉
歲時玉潤乘龍得幾年東牀空後倍相憐庭闈
珍惜珠擎掌碎比荷盤露不圓玉臺佳句少人
知斷壁零璣祗兩詩道韞清才吟白雪茂漪妙
格寫烏絲名擅閨房秀絕倫神如秋水淡無塵
于今復見顧家婦玉映清心又一人莫嘆遺詩
祇數行詩成應斷九迴腸寄言泉下休惆悵形
史今傳
姓字香

病中送春

帶病攜愁淚滿襟芳春飄泊自沉吟去隨流水無心問
別向空牀有夢尋詩寄梨花經雨瘦酒澆芳草和愁深
更闌無語空惆悵簾影交橫月滿林

新秋夜登溪樓弔虬仙清揚

角聲催漏夜涼輕客况蕭條夢未成紅蓼月高新燕度
黃蘆風戰戲魚驚起開閒閣詩懷遠獨倚危闌秋思清
千載白雲空碧落人間何處話長生

春思寄懷羽步

幾日春殘景愈清滿山新翠落花輕江風自引桓伊笛
嶺月時聞子晉笙鄉夢不隨賓雁斷客懷應向暮雲生
年年憔悴芳華冷書劍天涯悵別情

江舟次寄西泠錢夫人

長路關心景色淒片雲雙鶴偶相攜筆牀夢逐西泠路
畫艇魂消虎阜隄山翠滿窻人獨倚萍香夾岸鳥爭啼

行囊檢點詩千首半是西湖別後題

村居秋夜

戢影蓬蒿厭得名閒吟長伴草蛩聲平溪月上魚無夢
深樹雲來鳥不驚世慮漸消秋氣爽山花欲放旅魂清
從今我欲乘風去好和緱山子晉笙

閨怨贈芳娘

雲髻蕭疎影秋燈慘淡容一經離別後針線冷餘紅
不道腰肢減俄驚帶縷長當年嫁時被悔殺繡鴛鴦
枕冷驚秋夢爐閒幾月香不爭南圃樹猶得近東牆

寄龔靜照

詩狂生性與君同遺世搜奇興不窮見說綠牕嫺劍術
白雲深處禮猿公
自入秋來興未闌客牕酬和墨雲殘壺中別有閒年月
篋裏陰符夜夜看

秋閨

蕉窻無夢月痕低玉簫香闌淚影凄促織不知秋有恨
夜深偏向短垣啼

寄翠蝶戒指與姑因作

病危朝露意難痊檢點箱奩滴淚涓微物一枚留作念
靡依孤稚望垂憐

汪氏

浙江蕭山縣人適同邑王鉞結褵五載鉞故矢

志守貞

臨終作

白首完貞日青燈歸逝初萬千難記囑但守五車書

蕭山縣志庠生王鉞妻汪氏年二十歸鉞奉舅姑得其歡結褵五載夫卒遺孤洪源方四歲膝下親授句讀長延名師教之成立嘗謂遺金滿簾曷若傳一經以綿先緒乃命洪源陸續購書至數萬卷藏之一樓曰是汝父志也明大義不佞佛于義所當為如造石塘施棉衣捐貲傾筐亦所弗恤守節二十七載臨終口占一絕云云雍正二年題旌

范景姒

直隸吳橋縣人也著有冰玉齋詩集

池北偶談吳橋節孝范氏名景姒文忠公景文女弟也好讀書通經史尤工書畫繪大士像彷彿龍眠有冰玉齋詩若干卷歸同邑王世德二十而寡年三十九卒文忠撰墓誌見集中

題畫

翠嶂烟林疊復稠黃茅亭子枕溪流如斯勝境知何處
讀倦焚香且卧遊

張雲

字荆素號友烟浙江秀水縣人適曹廷柵夫亡
守節著有荆素閣詩稿

素絲篇贈沈貞女

吳蠶出素絲一束白於雪絳爲新袷衣服之本自潔誰
成錦繡段採茜復剉葉五色雖相宣素絲有時涅素絲
有時涅妾心終不移鞞鬟侍阿母不舉繡閣帷女紅勤
作息禮節遵書詩白頭有痾癢調護無暇時一朝旣許
字永結連理枝羊車雖未駕同牢百歲期豈意雙鴛鴦
永夜竟孤宿攬涕飾笄鬢蓬首不暇沐登堂仍事姑梨
棗等旨蓄慰姑得少安依然豁兩目長年盡婦職白璧
無點瑕茹荼食蓼苦堅守何怨嗟身存貴矢志一死焉
足誇

春感

何事停針刺繡慵香消玉骨恨無窮鶯歌巧囀爭新綠
燕翦平蕪妒軟紅辜負春光空望石迷離烟景泣孤桐
含毫難寫湘妃怨盡在啼珠血淚中

七夕

玉露初零漢殿秋晴空雲斂夜光浮銀河好證千鈞誓
眉月長藏萬斛愁天上雙星欣鳳侶人間比翼冷鸞儔
仙蹤會合旋離別迢遞經年恨未休

感懷

堪慟英雄七步才永辭鳳閣入仙臺傷心忍棄松筠操
夜月孤燈首重回

愁腸百折首飛蓬
頻聽鶉啼淚滴紅
靜憶儀容猶在目
堪憐何處盼歸驄

香盡金猊冷
細塵鶯歌燕語並
傷神鴛湖風景依然
是不見當年酬倡人

許在璞

字玉仙一字企瓊號冰壺江蘇常熟縣人處士

許灝女適國學生陸敘臣著有小丁卯集茹荼

百詠

沈宗伯德潛小丁卯集序略予讀許玉仙茹荼
百詠歎其多丈夫之行而志之苦尤令人悲也
初許字吾鄉陸君敘臣時父已沒憔悴窮感貧
女難嫁既歸河南而敘臣多疾時呻吟床褥間

撫前婦二子極慈愛而或以王祥後母搆之率
含忍不以自白迨夫亡益伊鬱無聊乃一以詩
發之悲嚴父之見背遡仲兄之友愛盡夫存歿
之分畢子婚姻之重凡孝友敬慈一一於卷帙
中見之而生平貞潔之操又寓意于梅花百詠
中標其奇格雕琢不加挹其清芬繁蕪悉剪如
湘纍楚騷一篇之中三致意焉而不以為復此
豈咒桃詠絮之露才者近卷軸成帙號曰小丁

卯集

許進益小丁卯集跋略吾妹稟姿明敏得宇宙
清冷之氣讀書涉目成誦先君子潮音公諱灝
及母氏姓孫氏絕愛憐之不辛少丁孤露無暇
殫心學問長適國子生敘臣陸君為繼配敘臣
夙抱隱疾顏唐自廢不復有志進取妹故鬱鬱
不樂既而敘臣捐館二子皆前配所出子然一
身形影相弔僅撥瘠田十畝以供饘粥吾妹于
是嘆吾生之不辰效達人知命獨坐卧一小
樓不復闕與人間事禪誦之暇時一染翰歲月
既久篇什遂多茹荼百詠蓋特其一也前輩黃

岡王西澗先生同里陳見復先生嘗一見之咸
擊節嘆賞謂宜登梓以備觀風者之采擇苦貧
不克事今妹年既老矣感歲月之易徂惟沒世
而泯泯於是刻減蠶鹽勤劬紡績累銖錙謀付
剗剛以爲知妹者兄
也屬爲畧道其概云
蘇瑗題小丁卯集詩斷腸吟徹氣干霄白雪誰
能強續貂天厄奇才成獨步性鍾宿穎見清標
蘭生空谷幽香遠菊傲嚴霜晚節饒
一顆智珠垂捆範更無纖翳玷靈苗

癸酉正月閉關謝世二月初三夜急病幾危晨起

精神如舊因書以記之

佛力果廣大慈悲能救苦幽婺畏塵囂閉關培朽腐生
死屬浮休壽歿由天數潔身養我志緘口免人迂深山
路難尋陋室門可杜謝世息機心孽地誠樂土何期洽

旬日魔頭病肺腑氣塞雙眸昏痛腸三復吐夜靜萬籟
虛孤燈垂一縷子子影隨身冥冥鬼爲伍神光暗裏照
邪祟不能侮未解學叅禪先受慈雲祐懸絲命旣微處
危心自憚笋抽高節見火息沉香炷至死矢靡忒餘生
亦無補

春草

雨過勾萌漸放叢無人行處易芄芄因風書帶飄牆脚
就煖金絲出砌中內苑未經容馬踐閒堦偏自惹烟籠
綠茵滿徑休芟却留取春歸襯落紅

睡燕

搆壘在茅堂安閒勝杏樑抱雛酣午夢翼子臥朝陽不
入劉家苑羞窺宋玉墻投懷徵吉兆結社應時祥高士
檻懸榻清禽影落床有時詩興發驚醒雪衣娘

雜感

綠牕粗習幾行書盥漱雞鳴侍起居寒盡幽蘭方出谷
春風悞認草茅鋤

薪水關心俗累牽不堪貧與病相連結茅欲遠塵囂去
何處青山弗要錢

沈氏

江蘇青浦縣人沈本立女字盛達三未婚殉節

絕命詞

嗟嗟良人早喪厥躬生未一面死見遺容松已風折柳
乃霜濃孤身安托地下相從翁姑父母撫育皆空所幸
兩家兄友弟恭承先好學經史勤攻兩親胥慰菽水堪
供女子之道從一而終爲媳爲女何德何功惟求他日
猶子綿宗九泉夫婦啣感重重

青浦縣志沈氏監生沈本立女自幼讀書知義許
字庠生盛執次子達三爲室達三未婚病故氏年
十八卽奔喪誓殉姑勸慰父母豫防從此茹素七
年守夫家則孝翁姑歸母家則孝父母不意清明
奠哭而歸侍婢懈防投縲遽殉衣帶繫有詩云云
其立志貞烈乃爾乾隆五十一年存年二十有四
知縣孫鳳鳴
詳請旌表

陳瓊圃

字闓真號鋤月浙江仁和縣人司馬半江親家
之第五女適歸安費臬臺元龍第八子國學錫
田天卒鋤月暑年聰穎愛讀書解吟詠善丹青
半江家教最嚴不肯輕以示人稱未亡人後絕
口不再言詩故傳之甚少著有鋤月小稿

水曹清暇錄予子婦陳氏胞妹瓊圃號鋤月仁
和縣人善畫工詩早寡故絕口不以文詞示人
予於子婦扇頭見其夏日有句云時花繞
砌芳迎榻瓦枕何妨隱睡鄉殊有幽味

秋仲偕藍若姊酣泉弟遊紫陽山

淡雲殘日嫩涼天姊弟同遊興灑然繞徑不辭苔蘚滑

拖裙恐被薜蘿牽錢江潮湧千堆雪鷺嶺松含萬壑煙
安得此間來結屋倘伴泉石度餘年

新秋

輕雲淡淡水悠悠菊婢花繁暑欲收明月滿庭珠露冷
一聲長笛又驚秋

懷姊

月印寒光滿院清一行雁字碧天橫別來無限相思淚
怕聽蕭蕭落葉聲

秋懷

滿窗花影漾微風幽夢還驚落井桐舊事不堪回首憶

新愁一片月明中

摘芳集卷之七終

摘芳集卷之八目錄

節婦詩

古歛訥菴汪啟淑選

彭氏 五首

陳彩玉 一首

梁氏 句首

戴若瑛 五首

田氏 三首

江士燦 四首

金氏 五首

孫淡霞 六首

浦氏 一首

陳韞輝 二首

李氏 一首

陸青存 六首

劉氏 句

蔡貞仙 句

鄭氏 一首

陳奕珍 三首

顧氏 五首

陳淑旂 三首

陳氏 句

沈淑蘭 二首

于氏 六首

李芹月 四首

擷芳集卷之八

古歙訥菴汪啟淑選

彭氏

江蘇長洲縣人康熙壬戌探花彭寧求曾孫女
適長洲諸生汪宗揚年十九夫亡無嗣苦志守
節事姑盡孝卒年三十一

外子端求省試不遇詩以慰之

涼風自西來踈林聲淒惻騏驥獨長鳴
俛首無顏色壯心欲何之空悲在槽櫪
豈無人服馬雜處誰能識終逢伯樂知
羣居莫歎息

老將

勳著麒麟閣君王詔獨班月明橫劍影風勁動刀瘢戰
合麾千騎軍行匝萬山髭鬚今白盡未入玉門關

秦始皇

六國平來震百蠻分符郡縣界河山焚書燬令坑灰黑
戰血兵銷築骨殷衛士後車驚博浪祖龍沉璧返函關
會稽刻頌沙邱詔不載蓬萊片石還

西亭

曲岸柴門秋景踈自疑身共白雲居西風獨坐閒臨水
一榻清風伴讀書

病中口占示姪

病廢機絲已一年餘生敢望尚留延獨憐死別高堂後
麥飯無人薦墓田

陳彩玉

福建莆田縣諸生昌言之室也

絕命詩

結髮爲君婦十年琴瑟調秋風隨蝶化誓與子同凋針
刺易書卷冀君名業新君旣塗中殞何惜此一身絕粒
求速死衆口與我違姑姨苦相勸留我欲何爲或言俟
卜葬此事不須時同室宜同穴山移志不移俯仰惟長

歎捨身死若生魂既與君俱心同蘭水清

福建通志云陳氏名彩玉莆諸生昌言妻言死陳終理喪具畢從容辭姑及姨娣作絕命詩飲藥死

梁氏

直隸正定縣人大學士清標女孫適四川巡撫

楊秘孫畿年十九歸畿九月夫卒甘貧守志

涿州志梁氏大學士真定梁公清標女孫四川巡撫楊公秘孫畿之妻也年十九歸於楊甫九月畿卒楊雖仕族然世以清節著家無儋石氏甘貧守節請立繼嗣翁國棟固許之終以其年少未敢決適氏父彬遷固原知州來京愛憐之欲攜赴任所氏拒不在翁微識彬意勸之行氏以翁命不得已遂行彬果令其改適憤惋不欲生隨病十餘日卒病中有寄翁詩云云其矢志不移如此翁聞之即為立後迎其柩與畿合葬焉

句

生為楊家人死為楊家鬼

戴若瑛

字謙雪浙江錢塘縣人祈望守戴鸞亭之長女

也幼聰慧從父授書有二弟自家塾歸輒相唱

和成有小集後歸楊氏姑早歿委以家政專事

操作遂焚棄筆墨絕口不言文字年三十有五

而寡著有凝香書屋草

古劍

寶鐔燭照說何從三尺驚看百鍊鋒魑魅影藏秋水冷

虹霓光射冶金鎔久埋茂苑須騰虎偶過延津定化龍
千載曾聞天外倚贈無知己但塵封

家君爲友人寫狸奴戲蝶圖神致生動余性愛貓
而未得佳者慨然有作卽題於上

坐有寒氈食有魚吳鹽聘取浴蠶初也知花底閒窺蝶
須向牀頭謹護書長者鼠名形踪應早匿女奴名字不教

虛從看寫出鬚髻影繞竹穿莎任所如

春日

翛然盡日掩湘簾滌硯微吟味亦恬乍暖乍寒春奄冉
如絲如霧雨廉蠶誰家錦簇花分樹幾處青垂柳拂簷

眼底韶光偏易過鏡中白髮已新添

窗前山茶分詠

絳色曾傳鶴頂名一枝獨發小盆罌不因晴日花增艷
細雨濃陰眼倍明

瞥見丹樓小院開深紅映照入簾來含悲記得三年事
亡女攜盆手自栽

田氏

湖北漢陽府人王文綸妻也天卒投繯以殉

熊祚永田烈婦傳烈婦田氏者漢陽田君生蘭
之次女諸生文綸之妻也烈婦秉姿淑慧稍長
僅識字旣而解文義因自力于詩然深自韜晦
雖諸父昆弟亦不輕示片紙隻字人以是益賢

之十七適王生克就婦道王生遭重疾烈婦祝
 天請代王生疾劇熟視烈婦若將永訣者烈婦
 慟謂王生日君若一旦不諱余雖不德稍知義
 理下無子息惟君是依敢念餘生以負君耶君
 慎勿憂余也王生遂瞑烈婦親為含殮經營喪
 事將畢謂母曰王生不幸中道見棄臨訣之時
 誓不獨生今將踐前言以相從于地下生為王
 氏婦死為王氏鬼父母之門無緣再入蓋是時
 水漿不入口者六日矣以頭觸柱血流滿面而
 母氏知其將圖自盡時與之偕烈婦偽曰兒尚
 不死母當歸矣其既去猶留兩婦婢時時守之
 烈婦乃自束髮紉衣顧謂兩婢曰衰絰之衣不
 可復脫誰拂余心死當含怨因自書絕命辭三
 首時夜過半守者稍懈乃投繯而逝年甫二十
 漢陽府志田氏王文綸妻田生蘭次女幼愛讀
 列女傳年十七適王王寢疾氏哀毀顛天願以
 身代謂王曰若不起予稍知禮義又無子息敢
 背所天耶王卒視含殮訖泣與母曰兒已許從
 王郎地下矣母留二婢守之氏伺婢倦
 乃自束髮紉衣書絕命詞三首自縊死

絕命詞

與君白首共為期誰料分飛慘別離我命豈同風絮落
 矢從泉路更相隨

辭余父母與諸昆莫話傷心早斷魂兒是西原陌上草
 雪凌霜妬已聲吞

冥路悠悠可緩行君歸我肯惜微生寧甘地下同埋玉
 豈學啼鵑怨五更

江士燦

字季媵安徽歙縣人適同邑張用咸早寡矢志
 家徒壁立為閨塾師以自給著有翠雲軒詩稿

秋深

秋律行將盡園林草木踈家家砧杵急處處稻梁儲雲
白驚天遠山紅落葉虛征鴻鳴夜月可有豫章書時大
人客

西江

夜坐

靜捲湘簾坐風來晚霧收鄰家吹笛罷月色滿妝樓

聞雁

繡罷身慵坐小樓半簾新月挂銀鈎黃昏岑寂已無賴
嘹唳當空字字愁

接夫子書

西風颯颯正淒涼忽報緘書到草堂慢說書中無限意

平安兩字值千行

金氏

浙江秀水縣人水部徐肇森之室也以子嘉炎

貴 誥贈夫人工書畫著有頌古合響集

徐元文金太夫人傳金太夫人十二世水部公
之元配也祖母徐氏即府尹公次女日金太姑
始太姑字孝廉金公九成家頗饒亡何孝廉公
卒遺孤僅十齡即太夫人父日金公壽朋族人
羣相睥睨忌有孺子在耳太姑知之密以公育
于外王父府尹公所其後數有家難司馬公又
曲為調護太姑感父兄之庇欲令兩家親好不
絕遂締婚焉太夫人性通敏強幹類太姑又習
聞太姑之教善操切家政生殖貲產金氏裝資
故厚稍復生敘家益饒水部公少有遠志好交

遊賓客筐篚宴會繁費不貲太夫人輒能以時
 輸給不匱焉水部公得以廣結客成名士者蓋
 亦由內助力也歲辛巳少卿公殉難隨州次子
 樛同時殉孝水部公身任請卹多浮費太夫人
 脫簪珥佐之產不損而事克有成乙酉大兵
 至南都失守太夫人賦詩云鼎革更 新主乾
 坤憶故人泊丙戌水部公殉國難太夫人哀毀
 幾不欲生作水部公衣帶銘曰天載無聲無臭
 君法惟一惟精既葬自髡其首習浮圖法稍以
 丙舍之產授諸子而盡出其衣食節省之餘委
 施佛寺曰遺子孫奚以多金乎卒有得佛理嗣
 法靈巖稱寶持禪師云太夫人少習書史博通
 典則知大義有丈夫識短章尺牘淹雅可觀畫
 入元人之室三吳閨閣爭傳購之其後更工為
 偈頌言有合響集
 源流頌行於世

題山水畫

雲烟俱淨水天一色雁序秋光樹踈山特箇般妙境天
 造地設彼何人斯拏舟坡側箕踞嘯傲悠然自得此中
 幽趣惟雅人識庸庸者流焉能窺測

七夕

天上停梭候人間乞巧時登樓穿綵縷陳菓卜蛛絲月
 照鴛鴦帳風飄翡翠帷雙星今夕會情緒問誰知

甲子上巳同諸妯娒釀飲南州故里

九域妖氛偃三吳佚事多泰階占上歷賓日近南訛杓
 指春當暮莫開候轉和得親真有慶于野更無頗稍訝

輜輶隔專容舴艋過乍探裴相島羣祝魯陽戈坐覺鷲
花換肩看士庶摩鄭風沿贈藥晉墨寓臨珂舉俗高絃
管斯人只澗阿分棚營異饌采勝息喬柯欲浣閒憂去
終如麗景何層軒留戲蝶軟革憶明駝道坦秦王輦沙
浮越女鞞神清千障入晝迥一藤拖曠若聯丹壁狂堪
臥碧莎鐵腸爭磊磊霜頂半皤皤老被微名縛生爲大
造訶敢云遊是幻直以智爲疴玉醴心相向銅山手自
擘隙光同度劫盤樂易成魔積困困文史孤身仰切磋
飄蓬掩紫塞冷竈卜金陀鼓缶離將爨藏山遜不磨誓
須偕里巷幸甚遠苴羅屢續攜觴會休傳抱膝歌擊鮮
通海艤陳瑞貢荆簪午月觀龍檝秋宵畫桂娥無方醫
痼疾隨處作行窩淑氣聊衣袷嘉賓且佩珂不辭歸興
盡綠水映顏酡

上元節聞有放燈之檄偶成一律

飛檄攢燈慶好時獨憐民隱未全知閭閻庚癸呼無濟
倉廩桁楊猛浪支樺燭空流千點淚踏歌翻引四郊悲
憑誰寄語傳柑客試聽詩人賦子遺

立春和弟廷侯韻

又見雛黃上柳條玉梅辭臘凍魂飄岸消殘雪寒初盡
江穀輕風暖見招玳瑁釵梁翻彩燕宜春螺髻鬪銀簫

金花紅穗年年勝祇是光陰暗裡消

孫淡霞

江蘇華亭縣人適青浦曹策彝早寡著有焚餘草

沈大成曹孺人傳孺人姓孫氏吾郡華亭人父廣益諸生也幼授以毛詩內則列女傳迨笄字青浦曹君策彝年二十二策彝來贅既交禮不一月而寡歸喪于曹生遺腹子晬而殤當是時君舅懷劬先生已先策彝卒逮事君姑顧太孺人孺人鬢而惡笄以婦兼子職堂上之養滑甘滲隨左右順適家故貧至是益困乏孺人綜理家政卒瘞拮据積緘菑所入為舅卜葬地為姑築壽藏而策彝亦以禮殯宗御咸以為難其撫嗣子鈞也延師受學督之甚嚴自塾出必課其所習勤惰鈞篤於學有聲黌序思紹其先人之遺業皆賢母之教也孺人少工詩既寡間有

所作輒焚其藁蓋孺人讀書明大義故克盡婦道而又自晦其才若此嗚呼是可傳已

小樓對月

柳粟上高樓長空月皎皎乍喜出雲端旋看穿樹杪星斗射芒寒園林誤昏曉一繩度嶺鴻幾處栖簷鳥牕中列遠山漠漠寒烟繞坐久欲忘眠憑軒豁幽抱

送春曲

輕烟淡罨春庭畔杜鵑愁向前村喚不知春去幾時歸但見飛花迴曲岸曲岸依稀楊柳絲蘭閨繡倦夕陽遲眼前景物驚非昨獨立閒階有所思記得春來催羯鼓百花鬪麗牕前舞閒從花塢弄花枝紅紅白白紛無數

我本無情情轉多韶華彈指病中過堆盤櫻筍餞春去
一曲清歌喚奈何清歌掩抑情何極堂堂一去無消息
爲囑梅花須早開浮香斜影踈籬側獸環深掩悵芳辰
年去年來送好春莫向紗櫺頻遠眺落花流水慣愁人

秋夜

深閨無意緒涼夜起新愁一榻空如月千聲并作秋金
風吹樹杪玉露滴階頭坐對蘭釭久茫茫百感投

閒居

欲避囂塵此卜居晝長添線樂何如松牕日瘦閒臨畫
薤簟風清倦枕書只爲課兒丸苦膽每緣繡佛品佳蔬

卷簾偶向庭前望一角晴山落草廬

春草

羣鶯亂舞雜花飛草色芊眠帶雨肥門罷西園香滿袖
蹋殘南陌翠沾衣白隄客過迷春霧青塚人愁弔夕暉
無那情根偏易長繞階閒步惜芳菲

哀詞

十首
選一

何年華表鶴歸來賫志徒銜百世哀豈是玉樓需作記
世人不及鬼憐才

浦氏

浙江海寧州人查克上之妻也

絕命詞

罔極深恩未少酬空貽罪孽重親憂傷心惟恨無言別
留取松筠話不休

海寧縣志查克上妻浦氏克上因父獲罪同死浦氏同姑史氏約自盡史氏先縊浦氏賦絕命詞四章其一云云遂吞金死

陳韞輝

江蘇青浦縣人陳潤之長女也適婁縣諸生揚
超能詩且善鼓琴揚生早故撫遺腹子家貧備
嘗艱苦後竟以勞瘁而卒

盆梅

芳名獨占百花端盆盎栽來更耐觀枝亞似從江上寄
花繁奚必嶺頭看香分几席冰同潔色映簾櫳月并寒
對此吟詩還啜茗何妨久坐漏聲殘

擬將高格寫毫端繞座幽姿好靜觀雪後西湖香可挹
春來東閣樹爭攢窗前媚雅枝枝瘦燈下蕭疎朶朶寒
勤拂焦桐依斐几試操三弄曲聲殘

李氏

適徐某詩見舒邑詩選

雍正乙卯歲節孝坊落成

而今七十已過頭回想多緣命不猶獨葬三棺期學范

自教孤子欲同歐黃連信未如心苦霪雨那能敵淚流
何意此情聞 北闕得邀

恩詔下南州

陸青存

字若筠浙江杭州人徽州守戎吳孔皆之繼室
也十九而寡守節撫孤著有森玉堂詩

孔傳鐸森玉堂詩草序畧森玉堂詩草守戎吳君孔皆繼配陸夫人之作蓋才媛而勵苦節者也夫人本吳中名族質敏性端幼嗜文翰年及笄吳君官濟上聞其賢且才委禽締婚焉于歸甫四載吳君遽捐館舍夫人年十九稱未亡人吳君故薄宦及後家無擔石儲夫人茹荼集蓼勤十指供生計而甘之如飴操堅金石焚其少作不復常親筆硯惟骨肉情深至性激發間一

寄諸篇什云

頌沙母陶恭人節孝

憶昔陶嬰明大義歌成黃鵠能守志貞操凜凜金石同
青史芳名垂億世猗歟太母嗣徽音後先清節曾何異
甫挽鹿車歸德門桓氏賢聲真不愧年方十七失所天
哭甚崩城枯血淚夫魂未遠欲相從何惜一死甘如薺
為有舅姑俱在堂旁無妯娌主中饋况兼遺腹屬厥身
弓冶箕裘賴以繼始復全生稱未亡天憐節婦誕賢嗣
永辭膏沐同毀容先意承顏奉甘毳舅姑幸免無兒悲
得享遐齡孝彌至儉勤勿懈家且饒丸熊課子成國器

膠序馳聲文行優董醇賈茂明經貴力謝賓興弗遠離
相依膝下娛親意祿養何如善養高先儒尹氏風堪儷
聖朝節孝首所崇旌閭曠典天章賁鄉邦因上太母
行省臣核奏容臺議遂邀旌典下所司烏頭綽楔雲霞
麗節衍書香門漸高孫技挺秀森瑤砌策名筮仕膺天
精馳驅五馬干城寄旋馳鸞誥荷榮封皓髮朱顏受冠
帔此日春秋躋八旬神明不衰全正氣始終一節詎少
渝末俗衰頹堪風勵鄙人薄命等秋霜少誦詩書畧識
字結褵四載寒暑棲一旦藁砧痛長逝熒熒弱質依雙
親之死靡他矢寤寐十指供餐鍼紉勤茹荼集蓼甘沒

世側聞太母植綱常節孝兩全格天地私心仰止嚮往
殷自此益知堅砥礪蕪詞覩縷誦高風古今陶母真無
二

仲春日贈別家大兄

曉色侵庭樹燈光映別卮丈夫重志氣骨肉惜分離世
事悲岐路艱難感素絲音書頻寄慰莫忘倚門時

偶題

世態何常且莫論祇今隨分樂吾身盤飧野菽甘從儉
鬢插高簪不厭貧親老每慙烏哺切兒孤惟幸鳳毛新
榮枯應有循環日識得天公意最均

瘦影臨牕古疎香映月寒愛渠冰雪意坐對竟忘食

寄長女

西風吹淚灑牕紗回首鄉關那是家縱使一身貧徹骨

願留清節對梅花

死別生離最可哀懸懸頻望雁書回夢魂不怕長江險

幾越瓜州古渡來

劉氏

安徽安慶府人宣國梓妻也事詳詩註

句

淒風苦雨憐孀節白日青天共素心

安慶府志劉氏宣國梓妻年二十五而寡夫兄度氏年少不能守且百計厄之氏遂依母鄉居積紡績貲數十金合葬翁姑及夫棺一燈教子遊於庠氏素知書嘗自銘座右云云

蔡貞仙

詩見華陽散稿

句

草草絃中曲忙來半局棋

史震林貞仙傳貞仙蔡氏父無子自教之讀書字於同邑之于氏年十九將嫁夫大病卜者曰迎婦則吉時父方歿母難之貞仙請于母曰往而吉違之不仁且無義也母然之遂往夫死分所簪如意釵簪其夫首脫一釧納夫之腕哭而絕復蘇初聘時夢金釧入手斷為草質取銀釧復斷如初珠翠

皆成紙花有吟云云至是驗云及殮截髮納棺縊
 于柩旁救之不死旋墮樓勿克夢其父示以節孝
 二字于是和顏示舅姑時姑尚未舉次子乘其喜
 常為說古今賢婦人為夫廣置姬妾獲福報者姑
 從之且使主家事忌者譖之貞仙辭于姑曰媳不
 才家事非能理也忌者又譖之謂其有他志貞仙
 乃泣曰節孝寧復能兩全耶于是夜取所讀之書
 并自書手跡與所作詩詞泣而焚之啟匣檢所存
 如意簪手釧各一泣玩良久戴而復脫者三嗚咽
 俯仰悲不自勝促老嫗先寢更衣對鏡掠髮取素
 繩纏如意簪于髻甚固抹釧欲噓顧女婢曰以托
 汝倘死勿為人所脫也且起襲故衣問安於姑所
 辭色和婉如平時午侍食既撤入房而縊時乾隆
 丁巳六月五日也年二十有五貞仙父字斗南其
 叔字秋岩
 余友也

鄭氏

江蘇江都縣人鄭茂華之女孫也適同縣廩生

閻麟生

遺詩

結髮情意重拋撇兒女歸傷心千古慘烈鳥願同飛

江都縣志鄭氏中丞茂華孫女也適廩生閻麟生
 氏幼嫻詩書動以古烈女為法夫病卒絕食者六
 日夫葬虞祭畢遂自縊遺
 詩云云有司加
 旌獎焉

陳奕珍

字蘊璞浙江天台縣人適同邑齊輝齋夫亡矢

志著有斷腸集

悼亡

所天何去若星奔妾淚絲絲袂有痕一夕陰風悲落葉

千山秋雨聽啼猿淒涼堂上珊瑚筆惆悵前鸚鵡樽
聊寫梅花和月影仗他香魄弔靈魂

淚濕牛衣苦共嘗思君昔日事堪傷憐兒扇枕憑風力
惜燭攤書借月光詩寄梨花香入夢酒澆芳草洗愁腸
本期巾櫛長為侍薄命無緣怨彼蒼

行思坐想竟成痴還道仙郎得返時冥冥父期兒力學
啞啞孫望祖含飴愁臨破鏡娥眉淡痛檢殘詩血淚垂
太息丁茶無了苦不如冥路早相隨

齊召南宗伯斷腸集序千古有真詩血性是也惟
綱常倫理中其聲為元聲其辭為正辭與月露風
雲迥異三百篇所錄半出婦人漢魏以來樂府亦
多言閨閣未可枚舉若吾叔母陳夫人斷腸集其

為真詩乎夫人異敏自幼稟承南陔先生家學以
碧天道人自負不幸吾叔輝齋公中道見背夫人
呼天搶地屢欲身殉以子女滿前強束髮身肩家
政斷腸集一卷所謂文情兼至堪泣鬼神雖古所
傳劉鮑佳什何以過之嗚呼吾叔文學有名志願
未遂玉樓簡促宗黨共悲得此編流傳人間雖死
不死九原可作其亦可含笑無遺憾
也歟丁丑季冬猶子召南揮淚書

顧氏

江蘇南匯縣人中翰昌時之女小崖先生成天
之姊也適桃源教諭朱侶陳著有甘茶草

顧成天甘茶草序先伯父聖偕公諱昌時順治
甲午舉人內閣中翰先姊其季女也髫齡親課
之經書大義即能通曉長適桃源教諭朱君侶
陳賢淑善文出筆清婉著有甘茶草以康熙丁
未歲卒子時公車未還歸索其稿室宇婢僕俱
更易不可得矣存篋詩文數首聊梓以見一斑

云

金管集註姊為先伯父聖借公次女歸桃源教
諭朱公侶陳詩文秀脫居然林下風味舅為寧
鄉令虧倉無補傾奩以償吳楚往返八千餘里
叔尚幼促夫供子職旅次不少怠有子穎而殤
即為侶陳置側室生子復殤哭之慟所作自序
祭夫文哀怨動人言動間左規右矩非尋常才
媛匹也所著
有甘茶草

甘茶草自跋余幼承庭訓長配朱門納采已前
浪傳季倫步障結褵而後惟攜趙壹空囊兼之
芸室長依但知素守護庭早逝久歷沉疴于時
藥餌躬調茶湯頻進慙懃半載舊疾全除奉侍
踰年新肌漸長本擬辭父母而適返鵲巢豈稟
翁姑而難推烏屋因茲暫留東坦權伴西牕折
桂無緣難遂青雲之志拔釵相助聊為肯藉之
謀花落花開屢換廿四番花信春來春去倏更
一十二度春光不幸覆巢無主贅婿難依歸空
室以啟朱門進畫堂而同白屋詢田園似鏡花

空影經費殊難閱倉廩如水月虛光撐支不易
堂上有太姑之奉室中多兒女之憐然猶謂桂
馥蘭芳晚歲之榮華有待豈知珠沉玉碎中年
之坎坷尤深嚴君訃報于楚中慈母疴深于喪
次返魂無術空啼血淚千行顧影自憐徒有迴
腸百結思劬勞之未報抱恨終天想鞠育之無
成含愁竟日家遭蕩析空結那移更驚宦海風
波深駭仕林荆棘豪門勢佔故產為墟顯宦婪
欺沈寃莫雪吳綾越錦藏蓄者誰楚地湘江馳
驅者屢况囊橐已空于疇昔家園復盡于今茲
嗟伯道之無兒代覓小星典完簪珥念曾元之
有父操持中饋貨盡釵環方期百歲承歡何意
兩期厭世臨喪拮据誰憐無米之炊卜葬艱難
未見連舟之助往者練裳竹筥聊畢諸女之婚
姻蓬矢桑弧還冀遺孤之成立親生之女門楣
亦可相依庶出之見箕裘還堪再紹詎料昊天
不弔又奪新雛薄命如斯重垂老淚嗟乎一世
苦衷聊書片楮百年永恨惟寄織毫念誰聞嘅
嘆之聲但自述
始終之概云爾

小粉場雜識南匯中翰顧聖借先生季女適桃
 源教諭朱侶陳者詩文古雅壺範端嚴著有甘
 茶草惜無力壽梓其中崇河賦祭夫文別燕賦
 等皆琅琅有金石聲誠我朝之謝道韞曹大
 家也慢錄其別燕賦于此惟聯翩之鳥垂雲
 軒以來茲舞輕軀之俊翮媚春日之遲遲脚落
 紅之香瓣穿芳徑而差池應栖文杏之梁誤壘
 茅簷之署喜幽齋之可居憎華屋而不處伴主
 人之寂寞藉時時而軟語倏流光之易逝欲辭
 巢而遠翥動秋思于鄉關將高飛而猶豫若乃
 鬱金堂畔玳瑁楹間議漾莫愁之明鏡竊窺趙
 后之雲鬟並呢喃於藻井又何羨乎綿蠻至若
 紅杏林中綠蘋池上拂快羽以臨風掠香泥于
 柔壤翱翔於碧沼芳園搖颺于珠簾翠幌將干
 仞兮非遙豈一枝之堪仿迺有孔雀羽翰之華
 鸚鵡能言之慧鴻雁啣蘆之機翡翠服御之貴
 終畢羅於虞人難全乎隱逸之計孰若茲鳥之
 忘機乃傍門牆而無繫爾迺棲止于衡門陋室
 渾忘乎王謝雕甍想戀此草青苔綠抑慕乎琴
 韻經聲既承眷顧於朝夕還惜徘徊于陰晴乍
 秋聲心愈愁悵王粲兮賦登樓

憶昔

憶昔幼齡時愚痴無所知每常依膝下亦解問書詩
 萱微哂答汝可靜聽之毛詩三百篇無邪以盡茲忠孝
 與節義丈夫力自持矧夫閨閣中尤不在文辭所議惟
 酒食無非亦無儀靜好於琴瑟無貽父母懼自經聞教
 後佩之焉敢遺弱質父母慰可以作門楣我辰竟安在

匪我每自悲猶念余嚴君文名弱冠時壯年不欲仕奉
養盡孝思一朝蒙主恩徵到鳳凰池秋風整襜被趣
裝上京師臨行重回首步履還遲遲我母淚盈腮山嶺
愁驅馳豈知一別後邈矣斷游絲傳聞武當遊訪道從
明師茹齋并戒酒幻影須臾移乘雲不復返三山伴紫
芝痛哉棄母女血淚染麻衰琴盡誰能託鄧守惜無兒
自從反鵲巢歸寧未有期遣人探阿母阿母臥牀帷女
聞心悲傷扁舟仍相維執手但掩淚欷歔歎數奇一病
十年久羸瘠無餘肌奄然而長逝遂爲永別離興言偶
及此涕泗亂交垂回首瞻依日往事不堪追

次繡餘譜雪美人韻

渾疑虢國去朝君新製冰綃白練裙夢入羅浮宜結伴
飛昇月殿可爲羣曾經賦識流風態未許香燃煖室薰
莫訝陽和消皓素從來世事等浮雲

重九

憶別鄉園幾度秋登高何處有層樓黃花未放身先瘦
白露方凝人正愁夢裏茱萸空插鬢面中竹葉未乘舟
何時重認橫塘路一覽吳江景物幽

送蕭珠樓

畫舸輕帆一葉飛垂楊掩映五銖衣多情最是溪邊月

獨伴蕭娘短棹歸

菊

孤高只合青山裏
移植塵埃劇可憐
傲雪凌霜甘冷淡
清幽夜月靄寒烟

陳淑旂

字繡庄浙江上虞縣人諸生陳志學之女適山

陰戴某早寡以清節終著有繡庄詩草

鄭太恭人邀登大觀堂遠眺

大觀堂踞臥龍巔何處笙歌象外傳
銀鬢朱顏光座上
玉壺金井在樓前
名花細裊深巖雨
野鳥頻呼隔樹烟

最愛日長山更靜
蓬萊小憩卽神仙

初柳

水晶簾箔漾晴光
萬縷千條繞步廊
人在漢關春自遠
夢隨吳苑去何長
西陵雪後無全翠
南陌風前有嫩黃
莫向赤闌橋外望
玉鞭驕馬最難忘

閨晚

織體怯春寒
名花帶月看
惜花兼惜影
不忍倚闌干

陳氏

福建人陳永華女

句

昔為箕帚婦今為罪人妻

福建通志陳氏鄭克壑妻陳永華女克壑者偽藩
鄭經螟蛉子也經西寇委政於永華永華引嫌立
克壑為監國經敗東還永華亦歿即以國事付克
壑無何經病亡諸弟於喪次揚言曰彼非鄭氏子
孰肯為之下環訴於經母董氏董氏命收監國印
幽克壑於別室諸弟怨克壑深夜遣烏鬼拉殺之
董氏以永華望重猶禮陳氏陳氏曰昔為箕帚婦
今為罪人妻官民禮隔願出居待亡夫百日後即
往從地下耳許之乃為別室以處陳氏置克壑柩
其中陳氏旦暮號哭如期懸帛柩側沐浴整衣自
縊而死

沈淑蘭

字清蕙號吳興內史浙江歸安縣人彥章明府
之女適諸生吳方救僅二載即寡守節五十餘

年著有黛吟草

憶姊

強說辭家夢在家凝粧無語髻兒斜離情種種憑誰訴
怕見園開姊妹花

七夕

閒持巧果獨凭闌靈鵲橋欵織女還莫道一年惟一度
已春天上勝人間

于氏

江蘇金壇縣人耐圃中堂之堂妹也適休寧汪
庶常燮亭

悼亡

送君南浦正初春驚報樓成赴玉宸有妾可憐身後累
無兒何惜未亡人蕭條旅櫬來燕市縹渺靈旗傍水濱
檢點朝衣今尚在憑棺慟絕恨難陳

遙天鴻度倍酸辛嘹唳猶聞唱和音幾點愁雲方黯黯
兩行寒樹正森森悲君不遂斑衣志愧我空輸纏臂金
今日典釵親奠斝九泉應惡酒卮深

生前嘗過飲力勸止之

置媵非因慕淑賢親恩婦道兩求全銀河濶絕三千里

錦瑟拋殘廿五絃素旄尚依桃葉渡

妾居桃花塢

靈輜頻駐

雪花天舟行阻雪而今始悟黃梁夢幻裏功名幻裏緣

館選未及

三載完姻甫週一年

長日增悲隨弱線瀛洲人杳惜華年驅愁無奈盈千斛

却疾誰能遣百煎堂上有年垂白髮膝前何日繼青氈

幾回夢裏牽衣問曾否商量一脉延

聞道臨危珍重言累伊辛苦主蘋蘩北方有藥如鈎吻

為庸醫藥餌所誤西域無香不返魂少婦低頭甘井日嚴親繫

念切晨昏他生若化通靈鳥願效慈烏荅厚恩

非戀浮生惜此身嚴君視我掌中珍

問名後卽隨老父入都

郗牀

已蚤憐佳婿鴻案無由慰老親對鏡暗傷鸞影隻思鄉

愁聽鴈聲頻阿咸記取臨岐語莫忘平安寄遠人

姪熙載送

至吳門而別

李芹月

字璧池江西臨川縣人直隸總制李穆堂先生
女孫也工詩古文詞適保寧太守蔡新儒之子
榮從宦遠游頗得江山之助榮早卒矢志栢舟
絕意詞華究心史學著有集惜燬於大茲從仁
和周茂才襄處構得數章

過澠池縣

澠池好會憶當年擊缶彈琴豈偶然
額樹蒸雲疑作雨溪風激石亂鳴泉
已悲逆旅歌三陟未息勞生卸一肩

日暮更投前路宿故園芳草夢魂牽

賦得風泉韻繞幽林竹

林下風來萬象幽娟娟細篠漾清流
於今淇水猶垂釣終古湘靈不浣愁
濕翠晨飛溥冷露澄潭夕暎澹新秋
碧山隱約烟光遠暮雨瀟瀟響未收

宿汴城

籃輿千里下夷門故國山河蹟尙存
五代精靈憑草木三川雲雨黯朝昏
春秋彭澤空回首燈火樊樓易動魂
懷古思鄉兩行淚離宮芳樹夕陽屯

西來偃師題壁

西來行路正威遲
一夕秋風住偃師
此地空餘綉氏嶺
笙寒月冷有誰知

擷芳集卷之九目錄

節婦詩

古歛訥菴汪啟淑選

朱景 六首

魏鳳珍 六首

石氏 七首

葉慧光 十首

錢涓 二首

廖雲錦 七首

周氏 一首

汪玉珍 十首

張氏 句

楊素中 十一首

張屯 六首

沈碧桃 一首

金氏 四首

趙雪鴻 二首

張介 八首

擷芳集卷之九

古歛初菴汪啟淑選

朱景

字曙雲江蘇長洲縣人適同邑李硯芸十九而

寡嚙指誓節詩見鸞嘯集

韓矩曙雲詩序畧戊子春友人以一編授余曰石湖之東山秀而水冽有士李硯芸者負卓犖豪放之氣娶于朱名景字曙雲雅嗜詩唱和切劘宮商叶而琴瑟調斯亦閨房之樂事矣無何硯芸竟賁志以沒曙雲年十九齡耳顧影徬徨熒熒獨守且外無舅而內無姑上無父而下無子無一畝之田供饘粥所居不避風雨蕭然徒四壁立曙雲之母太君者憐其遇欲奪其志曙雲則嚙指自誓勸愈久而志愈堅遂以利劍斷其吭幸鄰嫗救而復甦嗣後惟閉門辟纒饗殮

盡取給十指况聞曙雲具絕世之色待字時有
麗人名硯芸歿卽謝膏沐深自韜光匿影跬步
不踰戶闕間濡毫以弔硯芸總擯去一切綺語
余開函拜讀一過如聞午夜鶉聲惜無人陳之
于朝表彰幽隱而出之以見吳中正教之美也

秋日晚望有感

隔林小犬吠籬根遠野晴川碧一痕乞食僧歸紅葉寺
釣魚舟繫白雲村牧騎犢返扉將掩突擁烟飛樹欲吞
落日荒洲蘆荻外慢吟天問弔幽魂

病中卽事

杜鵑紅淚盡抱病擁寒樓風雨魚龍夜關河雁鶩秋藥
憐名獨活草不解忘憂天只兼人只傷心咏栢舟

落花

獨步東園雨過時落花片片滿堦墀可憐飄蕩隨風舞
那得奇方再上枝

衰柳

斷垣荒徑柳枝垂搖落西風亦可悲瘦盡腰幽夢冷
不將青眼鬪蛾眉

雁

風高月白凍雲開砧杵聲中一雁哀聞爾關河有書寄
可能爲我寄泉臺

詠琴

錦琴囊處半封塵記得松風一曲新欲把冰絃銷靜夜
燈前不見聽琴人

魏鳳珍

字友悟福建侯官縣人孝廉魏瑛女弟適廣東
番禺李聯芳年二十九稱未亡人著有紅餘小

草

韓侯釣臺

韓侯臺上秋雲陰韓侯臺下秋濤深英雄不遇出胯下
感恩一飯酬千金登壇一呼楚軍竄山河萬里全歸漢
丈夫生不爲真王欲假王名翻疑叛君不見狡兔死獵

狗烹識時勢者全命名功高徒取殺身計何不垂釣終
平生

武侯祠

未許隆中隱感恩應訪求三分籌地勢六出盡人謀勞
瘁蠻征日蒼涼星隕秋莫將成敗論正統屬炎劉

題菊坪兄萍踪集

夜雨瀟瀟玉漏遲挑燈取次讀君詩澹然情致陶彭澤
秀絕丰神韋左司名士從來困鞍馬星霜莫歎點吟髭
青山未許長高臥會看鷗鵬浴鳳池

送外之粵

別當歲暮更纏綿漫理行裝意惘然柳色愁縈人去際
春光到在客歸前關河君有離羣感衣食吾無負郭田
若見嶺梅花發早一枝先倩驛人傳

得菊坪兄手書

小樓風雨雁聲寒一紙書來鄭重看作客違鄉三百里
開緘先喜有平安

菊花次松師嫂韻

素質清姿迥軼羣香浮籬落傲霜寡知音惟許陶元亮

高臥南山一嶺雲

石氏

號慈石老人湖廣湘潭縣人贈君張春泉之配

顧堂明府張力行之母也事母以孝聞既孀以

苦節著

楊先儀書節壽張母石孀人事歲屠維大淵獻
春三月同官張君顧堂過余出乞言啟再拜而
言曰今年秋七月二十有五為吾母七十初
度之辰某將博求當代名公碩儒之文章以彰
吾母啟之所由作也顧厥體駢儷竊懼文之勝
而事不裸也子其質言之用徵信焉幸無辭余
于張氏舊有媼連又與顧堂同官浙中知太孀
人壺德甚備美不勝臚謹節其大者書之太孀
人石姓湘潭人父諱曰堅席閣為名諸生母
胡太君兄弟六人多蜚聲庠序仲曰養度以明
經為桂陽博士太孀人幼慧與諸兄從父受書
通曹大家七誡劉向列女傳旁及唐人歌詩既
失怙事母以孝聞年十七歸贈公春泉先生贈
公隸籍成均高才明經術屢躋場屋而意氣豪

上文酒之交趾接于閣築燕樓三間初圖史其中縱橫循覽不耐米鹽瑣屑君舅岷亭公世所稱張孝子者自居母喪廬墓下旋依崇節祠中栗主足不踐里闕君姑龔太君遂以家人事昇太孺人太孺人持簿算典管鑰織鉅畢辦贈公性侗儻好施與太孺人亦急義無少愆色有所賻戚某除夕喪其婦家貧無歛衣贈公欲有所賻太孺人立啟笥檢新衣付之或謂不祥弗恤也其他急義類是初孀子女並羸弱又二年而岷亭公卽世事夥費繁太孺人憂家之中落也劬體嗇用而奉龔太君精洗異等親戚饋問一如贈公在日而課僮奴耕畜緩急有條理歲入儲日用所羨拓市田宅垂二十年視贈公遺產益豐余聞諸湘潭人者如此顧堂又言太孺人免身凡九殤二男一女育者男子四女子二皆躬自乳哺慈愛曲至而待諸子不少假詞色不率教必跽之中庭垂涕泣譙讓或至予杖延師傅家塾盤榻必手治以進諸子夜從塾歸必篝燈親課偶言動失矩曉起必命媪白師傅扑責自某筮仕爲丞太孺人數貽書董教如兒時嗣某

歷試爲令迎養太孺人官舍每聽事太孺人從屏後審察小不愜輒廢食噓唏嘗誠某曰若起家下吏幸爲民父母何可不以愛民爲念人皆有父母父母之愛其子必無異於我之愛若勿謂一笞一撻無傷天和也吾聞親民官造福不難作孽尤易爲善無不報不善而昌者未之前聞顧堂所至有賢聲太孺人教也張氏自贈公之先五葉單傳不絕若髮太孺人實開厥後三十年間孫曾幾三十人或小試于吏或以儒學鄉用彬彬日上勢在方輿余修猶子之誼嘗問訊太孺人于寓廬之堂見太孺人髮小斑步不杖音聲清朗耳聰目明嚴然五六十歲人故事孀居必三十歲以內方與旌門之典太孺人所爲秉節以成其家者於法得旌而年例小踰顧堂烏鳥之私未獲遂焉然顧堂通籍後兩遇覃恩

敕封孺人今且康寧壽考老福未艾斯以名者予以實天之報施當有在矣顧堂名力行官海鹽令今調平湖太孺人第四子也

七十生辰作

余就養四兒力行官舍四載於茲今七十生朝
力行蒼萃所乞壽言歌以侑觴老婦何幸得為
大人先生齒錄顧其詞類多侈頌愧不敢當振
觸余懷若有不能自已于言者因仿杜少陵寓
同谷縣詩體作歌七首第七句即用其語少陵
以飄流鳴感而余亦數十年來備嘗茶檠之境
詞不相襲遇若近之吾子孫
能喻此意庶幾知所勉焉

憶昔憶昔初作婦鬢髻白髮娛太母舅扶鳩杖晨上堂

捧羹小步君姑後秋風獵獵動地來萱凋椿瘁養何有

嗚呼一歌兮歌已哀孝子有後栽者培鄉人稱先舅為張孝子

夫子夫子天下才興酣搖筆驅風雷江東米價了不知

摩挲爨鼎顏為開文章獨憎杜甫命生死惟託劉伶杯

嗚呼二歌兮歌始放燕樓風月秋自爽燕樓先夫子書室名

秋茶秋茶味孰知晨餐夕啗甘如飴黃泉碧落擬相逐

留意哀此諸孤癡良人遺恨目未瞑覆巢欲墮須撐支

嗚呼三歌兮歌三發容易成家力早竭

昊天昊天生我劬母兮教績父授書女子有行安得養

樓頭凝淚瞻親廬顯揚恨非巾幗事無瑕誓守白璧軀

嗚呼四歌兮歌四奏保身敢忝門楣舊

有妹有妹矢從一女而不婦老於室青燈紅淚五十年

博得烏頭耿皦日螺贏負子教誨勞他年九地心堪質

嗚呼五歌兮歌正長相思不見天茫茫妹幼字曾氏所事者不幸而天

殊年才十九誓不再適力請于母氏衣素哭奠曾氏子之墓歸局一室勵志守貞母憐之子田數畝以給其養今妹年六十餘矣方得嗣子相依朝夕悲夫窮哉嚮余就養力行官舍欲邀妹不果行白首天涯每一念及輒為淚下也

我來就養愁轉劇鞭扑聲中簿書積從容肆應良復難

聖主深仁在保赤官名父母須慈祥家有子孫要蕃

碩嗚呼六歌兮歌思遲筵前有酒民膏脂

子季鞅掌閩海邊諸孫文戰留湘川人生何必麋鹿聚

所求無忝繩其先我家祖德方綿綿我今老健天所憐

嗚呼七歌兮悄終曲蟾窟風香落金粟

葉慧光

字妙明白號月中人江蘇南匯縣人中書鳳毛

之長女也適婁縣王子進之結褵未一歲而寡

青年矢志以詩遣其悲傷著有懷清樓遺稿疏

蘭詞

葉鳳毛亡女慧光行畧女於雍正辛亥歲生於京師甫能行即知拜跪之節家有六士像晨起必焚香膜拜至去歲病不能拜方止似有佛性者四五歲諷唐人絕句即諧其聲情自六歲至十三逆良師教之四子書詩經小學左傳皆能通曉余與今分司潮州王曉烟同為舍人時王請聘女為媳余見其子方十一齡屹然如成人許之余歸後婿以連誦于京兆發憤過程遂得瘵疾是時婿年十九女年十七歲丁卯婿贅余家形體骨立強持就禮余診其脉肝浮而數腎微而代當危于春女日命也館彌月婿必欲歸郡省覲居數餘日來復感風寒疾益甚分司夫

人來視見新婦婉嫕嗟歎嗚咽數日婿竟卒方其始館而疾也晝則少安夜則咳嗽呻吟達旦女摩按以遣之憂惕盡瘁至是投地崩號絕而甦者再四使夜宿于母晝呼大婢守視而弗能禁其晝哭哭之慟血隨涕唾而出踰月與喪俱歸姑曲加慈愛不責以新婦之禮女之省晨昏承顏色未嘗以哀痛疾疢而缺去年春分司入觀取道家門女力疾趨見歸而嗽血盈椀夏分司夫人偶恙女正卧牀恨不得侍日為之占筮祈禳令婢夾持親禱于大士姑病瘳而女之疾日以痼十月初嗽甚遂大困憊言我死已久也向之不自死為戀父母舅姑今天絕我我能強乎願任其死母與湯藥十一月分司夫人來省視知疾不可為女且嗽且哭以訣今年三月嗽忽止惡食又遷延一月而逝分司夫人臨其喪以次君長子繼善為之嗣女之孝恭淑慧固其性成孀居後學製詩詞以疏悲憤不為靡靡之音後深自晦匿與人言若無能者余訝其工為刊而行之

清詩備采慧光自號月中人為舍人葉君鳳毛女太學生王子興賢配幼愛讀書詩得家學年十七于歸逾年夫歿孀居後卧病六年而亡平生著作多焚去葉君偶於殘帙間得詩詞數十篇不忍其湮沒為之付梓題曰懷清樓遺稿

小粉場雜識南匯葉中翰鳳毛愛女慧光歸琅邪王進之甫三月夫亡欲以身殉中翰百方撫慰孀居以詩解鬱逾四秋終以嘔血病年僅二十有四其懷清樓遺稿才氣雄俊不類出之閨

寡鵠四章章六句

寡鵠寡鵠集于飛蓬既滄以雨曰淒其風中夜戾止視

天夢夢

寡鵠寡鵠言集于野野有稻梁亦有稷黍將翔將翔誰

弋其侶

寡鵠寡鵠隻舉單棲羣鴻徂征日余尾誰警唳宵旦愴
矣其悲

寡鵠寡鵠爰止于木日月常孤豈惟予獨星星不燿昭
昭孔矚

題桐葉

心驚一葉墜涼院秋風早春華曾幾時衰動不自保元
蟬留哀聲白露颯清曉惜此鳳凰枝飛蓬其枯槁

秋夜思

天涯莽互飛蓬卷月照空山桂花晚碧紗窗下起蛩聲

喚起機人不容懶銀箏摧柱瑟無絃雲破月來如鏡滿
空庭無人秋露涼更闌坐怯沾衣裳玉宇瓊樓塵不到
一絲輕骨夢銀牀

疾起作

秋氣已蕭瑟秋光殊淡妍捲簾涼露下待月小燈前遠
水迎新雁疎林墜晚蟬今朝紈扇意含怨屬誰邊

七夕

曝衣樓上望天孫河漢星高手可捫丹鳳銜梭穿錦綉
烏鴉填水接乾坤刀頭破鏡纔窺線褥底涼蛩又返魂
巧拙未忘兒女意爐香小炷拜黃昏

蓮花瓣

纔看出水又飄殘薄命紅顏似妾顏待把題詩當秋葉
恐流哀怨到人間

與穆南論詩

才命相妨未足言文章氣節兩難兼可憐斑管題諸手
前有安仁後易安

錢涓

字裴文浙江秀水縣人舉人錢泮之女適平湖
薛雍可著有抱雪吟

裴文抱雪吟自序聞之登高能賦遇物能銘文
人伎倆豈巾幗所有事然性之所近自不能已
憶予甫離襁褓先子之教予一如所以教子者
子遂得優游寢息于藝林雖東觀圖書未窮十
乘而西崑簡冊聊見一斑既歸薛君奉事舅姑
而外卽與校讐史籍商畧風雅樂此不疲忘年
永日何圖不祿中道棄捐伯也遼鶴游魂未還
華表予也孤鸞隻影愁對菱花間以風雨飄飄
因而破巢取子憂心惓惓無復好懷自分雅宗
墮地翰墨無傳而臭味難忘時形咏嘆或爐烟
一剪或燈炮半篝或兩撲窗櫺或雞催曙旦思
以情生情因境出長吟短謠予將假是為忘憂
萱草焉是用不揣固陋從事殺青就正大方集
成顏曰抱雪以余熒熒未亡甘向終南陰嶺伴
老雪蛆是又區區
欲見之素心也

虞美人歌

楚歌四面起項王兵敗矣項王敗兮虞何為死王劍兮
魂相隨長夢應憐歌舞宴月明從此照空帷堪歎八千

子弟也終無一箇揮戈者玉顏飛血逐東風化作年年
淮草紅入春常帶傷心雨至今猶自泣重瞳

山雨

晚結陰雲日不輝
霽霽雨透濕羅衣
窗前萬綠渾如洗
坐看巒烟夾岫飛

廖雲錦

字蕊珠號織雲江蘇青浦縣人古檀次女也善

丹青適華亭馬某著有仙霞閣詩草

墨香居畫識廖雲錦字織雲號錦香居士青溪古檀明府之令媛也資性慧異隨父任合肥時纔數餘齡耳書史之外即喜畫花卉翎毛後歸泗涇馬氏家有肯園錢塘畫史賀永鴻常居停

焉因更得其傳色鈎染之法古檀歸里後歲在壬寅集諸名流于小檀園中兩修禊事錦香因以畫呈于王述菴深加激賞旋贈以洋紅辰砂等物屬臨所攜南田及清於江香諸畫册于中是畫日益進求者甚衆然余嘗論其畫于妍麗中自具秀骨于粉墨間時露清姿則固出自性靈非尋常學力所能到錦香所居有讀書樓夫亡後健戶焚香或撫琴懷古或對物寫生或吟詠詩篇以寄其愁寂之致洵閨閣中雅才也同時與錦香郵筒唱和者有莊磐山金翠峯張藍生諸女史汪職方秀峯均採入名媛集

上巳大雪偶作

佳辰紀執蘭峭寒失和煦百卉開較遲苦被愁霜妬雲
氣低壓檐莫辨烟中樹須臾急霰集淅瀝紛無數糝徑
補苔花因風雜柳絮瓊霰漸委積草木悉依附以增桃

李顏借此飾縞素曲水停飛觴浮橋阻晚渡不賡右軍
篇重吟道蘊句此夜山陰舟應為訪戴去

寄贈張麗然女史

女史著讀
易新解

華宗舊溯鳴珂里川媚山輝鬪綺靡蘭閨秀發清淑鍾
華萼三株看濟美就中伯氏尤擅奇嗜古獨得苞符理
三才萬象羅錦心治經矻矻窮端委七十六家義蘊該
神遊別契淵微旨餘才抽秘逞清妍詠絮風裁差足擬
歷遍冰霜二十年郝鍾令範非虛紀緣知巾幗亦儒宗
帶水迢遙徒踵企愧我臨池筆未工悔買胭脂務未技
側聞大雅倍仰欽見獵怦怦輟自喜何當示我瑤華篇

薇露開緘拂淨几拋磚願得引珠璣素心神往水中沚

寄懷建門姪時在浙江學政石君朱公幕

白門秋老雁程分

先同恩光姪晉謁於
金陵試院分途赴浙

星使高依襲桂

薰策馬柳橋初作客燒鐙蓮幕細論文功名夢幻疑滄
海顧復恩多感暮雲遙遞書郵期努力武陵自得抵河
汾

何母費孺人貞孝詩

孺人華亭何
君煥章聘室

烏欄未遂百年盟占易偏逢利女貞破屋總帷焚紙夜
小窗燈火課書聲續成夫婿生前志爭得鄉閭死後名
巾幗叢中真砥柱冰心羨爾玉壺清

冬夜懷眉洲弟時在齊東署中

分襟草草不言愁短劍殘書亦壯遊
船尾好風驢背月人烟稠處古齊州

親舊重逢破旅顏衙齋如水酒盃閒
探奇愛縛吟膾去一角晴明鵲華山

蕭疎落木雁聲孤應向天涯憶姊頰
一盞寒檠風雪夜

誰人煮藥為燃鬚

今歲常為二豎所困

周氏

江西安福縣人朱攀室也事詳詩註

夢夫

月冷梅山照夜臺妾身未死已心灰
十年地下無消息愁絕西風刮耳來

吉安府志朱攀之妻周氏年十九守節氏通文墨傳夢夫一絕句云云乾隆二十八年旌

汪玉珍

浙江錢塘縣人適常熟孫鍾早寡著有雲芝軒集

哭莊儀姪女

十首

霜閨晨夕笑言親應是情緣具宿因
自恨此生真命薄更誰相倚未亡人

黯黯悲風向晚吹空幃無復覩芳姿
妬花風雨何無賴

腸斷清秋桂發時

珮環今已返層城空有餘哀結再生非是慧根多不壽

玉京去伴董雙成

零落珠鈿恨未窮畫樓人去鏡奩空芳魂不昧生前約

彷彿還應入夢中

消瘦秋容怯晚妝早知惡夢本非祥綠窗此後簷前雨

不敵空閨淚點長

貌得芳容入畫圖淒涼無計慰孀姑自憐皮骨空存日

更使雙睛爲爾枯

佳婿乘龍得所天久憐婉婉亦稱賢那知泡影徒成幻

玉碎珠飛月不圓

繡戶爭傳詠絮才埋芳無路達泉臺香階遺跡虛留印

蓮步塵生一寸灰

刺繡蘭房憶往時彩雲飄去竟何之阿誰坐對分金線

慘淡紗牕月到遲

寢食相依十五年不堪花謝曉風前持齋願禮維摩佛

乞與香奩再世緣

張氏

湖廣人善畫工詩事詳詩註

句

不須更作迴風舞寒到蓬牕已十分

瀟湘聽雨錄有張大家者孀老且貧寒栖江夏善畫工詩以筆墨自給雪中云云風况清絕潼關楊迂谷大令鸞儼居武昌時知之惜不詳其里居姓字

楊素中

自號青田生浙江秀水縣人楊文淳長女也適太學生劉文煜早寡著有石軒詩稿

讀書

我愛古人書焚香細心讀自憐閨閣中玩索非干祿紅日轉如飛繼晷常秉燭可惜一寸陰千金莫能贖

習靜

世事原無定何須較短長忘年惟木石投老有文章月照松欹瘦風飄桂粟香望中秋意滿雲水共蒼蒼

賦得烟雨養春姿

暖送韶華轉清姿長養勻花紅含雨醉柳翠帶烟新物阜風光好時和造化均秀酣金谷草香倦玉樓人梅影融殘雪鶯聲囀早春恩膏沾品彙 聖德徧陶鈞

夏柳

春歸仍愛綠垂絲牽綰詩腸靜裏思葉密尚聞鶯語滑花飛曾逐馬蹄馳輕縈鳩杖風生處濃拂魚軒雨過時築箇茆堂人絕迹炎氛不到倍含姿

古檀詩話春柳秋柳詩多矣乃構李有夏柳倡和詩閨秀楊素中詩云云後見方芷齋又有寒柳作一柳也雕鏤殆盡矣

東風

梅花雪裏暗生香
修竹扶疎月影長
寄語東風須穩重
莫教輕易到迴廊

結廬

槿結藩籬草結廬
湖光雲影伴幽居
鳶飛碧落魚沉水
小坐南窗讀道書

鴛湖采菱曲次韻

采菱深處浪花浮
一片湖光十里秋
儂愛纖纖尖角好

輕風疎雨坐船頭

水色澄清月色浮
菱花泛泛蓼花秋
種菱只要年年熟
換得銀釵壓鬢頭

一棹鴛湖曉氣浮
小姑含笑弄清秋
凝眸住手低聲喚
嫂且停橈泊岸頭

曉色迷離白露浮
風花片片滿船秋
今年菱比去年好
采盡南頭又北頭

蝴蝶花

蹁躑舞處傍柴扉
靜趁微風似欲飛
不藉滕王凝粉黛
輕翻嬌影帶斜暉

張屯

字麗然江蘇婁縣人研究周易工卜筮適國學生褚念劬二載而寡侍姑撫遺腹子矢志栢舟著有易道入門二卷自箴語一卷與諸女弟倡

和彙為小華萼集二卷

陸夔小華萼集序云風詩三百篇半出自婦人女子之作以故名閨淑媛祖三百篇遺意於女紅之暇以吟事爭奇小山香茗諸集所由膾炙今古也我鄉女士張夫人為鳴璧公長女歸節裔國學生褚公明懷余同學雲鵬迺夫人令嗣也夫人生而穎慧垂髫曉讀書及長耽藝苑吟哦樂府俱出自鳴璧公口授遠近皆奇之特是結禱未久鸞鏡中分以觀其遇亦云窮矣夫人安義命隱處素幃孝專其姑內言不出于閨撫育稚子九熊畫荻不輟晝夜間乘課讀餘閒于

易理諸書探源窮委幾堪與宋儒分席因以靈臺餘慧擗管成章與諸女弟交相唱和彙為是編得詩若干首其集中所詠大都寫其冰雪之心斷機之志奉慈姑享父母至情至性之所發非如小山香茗諸集聊自遣懷而已也夫扶輿清淑之氣鍾于男子尤鍾于婦人熙朝名姝輩出身不越香閨綺閣之外目不觀山川風物之奇本其幽思發為吟詠而性真語摯名流士大夫往往見而閣筆夫人之著斯集亦其嗣音歟此編行世洵足深人禮義之閑感孝慈之念于風教有裨焉寧徒博彤史之流徽也哉

條山王鼎題詞選樓風尚溯機雲拾翠分來體不羣曹大家今留谷水紅餘手播藥房芬天然孝友聚蘭幃咳吐隨風珠玉飛合繼栢舟登國史謝庭枉許錦為機圮授堂前碧草滋年來花萼苦離披援琴不盡存亡感韻咽霜橫月落時江渚風謠繡閣多蘭心桂質耐吟哦玉堂一例輶軒貢貞怨休虞小序訛

張興鏞題詞云完玉牽蘿感隻鸞春暉一寸奉親歡詩鑄苦節貞義畫莫作尋常咏絮看心是蓮華身是梅宿因悟及夢瓊瑰玉臺夜夜嬋娟月留照殘膏淨劫灰姊擬光威妹擬哀一家慧業噪瓊樓關心最在明星爛詩教時憑鈿管搜

與三妹昭四妹瑾暨雲鵬兒談易

讀易貴洗心探索妙契默根窟雖微奧研思終可得義
 畫文周彖孔子傳辭翼窮參造化理天地人三極循環
 轉運機陰陽互消息靜以分翕專動以交關直博施化
 育功大哉乾坤德人道即天道貞固无邪慝易知而簡
 能崇效卑法則居則觀其序虛含畫前易動則玩其占
 觸類廣知識動靜天機流在在皆著劫進退存亡理惟
 明辨順逆悔來思補過咎至刻自責虚心白受采下學
 謙受益五常處五倫知至行必力陟遐先自邇九仞一
 簣積弗得弗措之人一而我百

江南曲

疎牕軋軋鳴機聲三日織來匹未成迴腸曲曲如絲亂
 亂絲不斷腸偏斷昨夜西風吹枕寒夢回頓憶客衣單
 江南塞北音塵隔生死無憑憂不釋憂不釋填胸膈君
 若堂上無老親妾身拚化山頭石

病起懷三妹

病後踈慵甚秋風掩碧紗瘦容羞淡月孤影怯黃花咫尺

尺同懷遠相思別夢賒空閨聽雨夜對榻憶居家

春日寄懷三妹閨齋

病懷寥落感離羣空對晴光錦繡文吟罷看花應念我
夢餘步月最思君一溪綠水同春色數武紅樓隔暮雲
開卷每忻新有得獨憑孤館望斜曛

雁

落葉隨孤影秋風萬里心一聲霜月裏喚起數家砧

何母費孺人貞孝詩 有序

孺人費氏籍婁縣華亭何君煥章聘室也年二十未婚夫夭歸何守志歷三十九年如一日論者難之作長歌以記其事

我聞共姜兩髦咏儀特貞婦山頭身化石孺人未婚誓
栢舟望夫那識夫顏色生長名閨待字年高陽舊族慕
其賢粉郎射雀爭誇美一締紅絲卽所天同心未縮絲
蘿絕鴛牒驚分方寸裂慈親惻愴勉其生宛轉呼天剖
冰雪母欲兒生願有家玉可毀兮不可瑕生願影堂事
蘋藻死願骸骨同黃沙無妻無子哀熒獨殤喪誰服斬
衰服有妻成家立孤嗣寒食年年薦麥粥母嘉其志許
以歸素車縞衣拜總幃恬然爲婦夜不啼夢中蝴蝶亦
孤飛嶢嶢頭玉蘭芽小季子生兒慰提抱孔雀東飛十
指勤萊衣代子娛親老昔日朱顏婉變姿愁侵綠鬢漸

成絲嚙藥茹茶甘若薺氣和家瑞榮荆枝歸寧慈母告
師氏依然乳慕嬰兒子事母事姑同竭力餘陰課子讀
經史孤鸞鏡破髻鬟封縱有蘭膏誰適容不管春華幾
開落歲寒自保後凋松冉冉星霜四十載艱易始終心
不改一腔血淚封姑墓阡表揚親志有待烏頭綽楔邀
天恩恩波澤子還澤孫馥馥貞名垂國史千秋共目
孺人存

沈碧桃

字里未考詩見陳簡侯留青集

悼亡夫

菊老桐枯正暮秋閒齋獨坐暗生愁可憐野鳥知人意
也向西風叫不休

金氏

江蘇吳縣人金廷珪之女適烏程國學生董三
鳳著有綠窗閒詠

茅應奎絮吳羹孺人卽其姑太孺人之姪女父
爲州司馬天章于歸董太學瀛洲後眉案相莊
嬪則有聞迨嫠居時年未四十而克持門戶撫
三孤以教育詩亦雅嗣遺音第貞燕離鴻音節
淒婉見者傷之予與兩家俱屬
舊戚特拔其尤者以志慨云

次韻簾捲春風燕復來

雨釀芹泥報早春風來東面社期新只知壘在歸庭戶

不信梁空失主人
小院開時頡頏舊
疎簾鈎處去來頻
畫堂處處多雙宿
絕少單栖失偶身

秋夜有感

月映疎桐透樾陰
新秋悲思獨沉吟
金風吹動簷前鐵
玉軫難操石上琴
歲序遷流渾瞥眼
人生死別最傷心
往時逸興今難再
坐對清光淚滿襟

見梅開有感

簷前疎影昔年枝
脉脉含顰伴怨思
恨煞玉樓人去遠
滿庭冰雪冷空墀

雨中楊柳

輕風剪剪雨絲絲
無限縈情是柳枝
小閣捲簾春睡起
市橋一望總迷離

趙雪鴻

號清蔭浙江錢唐縣人
趙太守本植之女兄適
秀水潘生秀山潘卒欲
以身殉因有遺腹老姑
強延以代子職著有詩
集遷居臨平致遭散失
嘉樹軒初夏分賦

竹繞環扉水繞村
山川秀色萃閨門
溫和如玉風姿潔
氣味同蘭雅誼敦
新得花箋賡白雪
遙思月榭酌清尊
揮毫潑墨供幽賞
富貴浮雲豈足論

次閨友韻

平生相契問誰何只有高人感最多
傾倒詞源推藻雪纏綿寤寐逐春波
醒來子子惟存我別後茫茫遑計佗
異地豈能真間阻晤言常得對詩歌

張介

字筆芳江蘇婁縣人太守蒙泉季女適上海沈
璧璉著有萬花樓詩鈔

諸葛菜一名蔓菁

沿階多蔓菁一雨遂抽碧紫花浮茸茸綠葉蔓無隙云
可佐菜羹芼以薦嘉客思昔諸葛公軍行乏禾麥藉之
爲餼糧飼馬計亦得自古行大兵軍儲貴籌畫苟無芻
粟資告急何能擇微物頗易繁所在供朝夕今人少種
藝嘉蔬未聞食流傳信有之盤餐庶採摘寄語食肉人
此味毋輕擲

銀瓶怨

金牌十二來軍中黃龍不搗中原空上下相蒙和議定
穹廬那得歸兩宮斬王解柄鄂王死百戰勳名付流水
長城失自小朝廷偏安屈辱甘蒙恥九蠟潛通構陷成
銀瓶欲墜志難更風波三字定冤獄覆巢之下豈獨生
如花竟向井中沒冰心一片澄寒月宋家半壁竟難支

搗芳集 卷九
閩中弱質餘芳烈古甃深沉久不波瓣香瞻禮今如何

題王麓臺松壑流泉圖

設色染峯巒濤聲殷松樹巖壑一何深烟雲繚無路其上飛瀑流曲折向低赴穿石似琤琮寒輝玉龍度何當此消夏驅暑過亭午松泉奏清音和我朗吟句

白荷花

別自冠紅芳蕭然韻野塘沙明容宿鷺波淨避文鴛露重珠難定風清氣倍涼亭亭堪靜對恍在白雲鄉

落葉步家大人韻

秋來何處促魂消一望千林頓寂寥抱樹寒蟬餘斷梗

歸巢夜鵲訝空條聲隨鐵馬因風送影趁蒲帆帶月飄
詞客不須頻悵悵春來依舊綠陰饒

賦得秋露如珠

露下中天秋氣清十分朗湛十分明擎來仙掌光難定
泣罷鮫人結未成穿柳線疑穿線巧走荷盤似走盤輕
拈來不比勻圓樣留與閑階賺鶴驚

桃塢

滿塢碧桃花欲奪朝霞色不是武陵源漁人詎能識

暮春之望

柳絲窄地景暄妍紅滿園林綠滿川檢點韶光將穀雨

輕陰正是養花天

摘芳集卷之九終

摘芳集卷之十目錄

節婦詩

古歛訥菴汪啟淑選

范滿珠 五首

劉氏 一首

陳玉岑 十六首

方寧 三首

沈蒞紉 五首

楊涓 一首

曾淨蓮 三首

諸餘 二首

衛琴娘 二首

吳氏 四首

楊淑貞 五首

吳絲 二首

許元淳 一首

李蒞 七首

郝湘娥 五首

林錡 句

何其瑩 二首

扈氏 二首

徐鍾璧 一首

朱氏 一首

黃汝蕙 四首

程慰良 八首

魯氏 句

擷芳集卷之十

古歙訥菴汪啟淑選

范滿珠

字劬淑安徽休寧縣人適同邑戴邵菴著有繡

餘草

無名氏范劬淑詩序詩三百五篇多婦人女子
 之作而二南之篇咏嘆后妃夫人之事所採掇
 則苻菜卷耳芣苢蕢蘩所服御則絺綌澣濯所
 見聞則桃夭樛木兔置草蟲託物近取義遠情
 動于中而形于言被諸絲管為房中之樂如是
 而已春女哀秋士悲鸞鳳有歌舞之容燕雀表
 啁噍之感班姬之賦齊紈卓女之吟溝水塘上
 傷離隴西贈別纏綿綺靡不失閨門本色漢魏
 已還變風變雅之遺音猶有存者近世閨秀之
 集多於稻葦花葉駢儷金碧填砌觀者瞶亂眩

運而不知所由來其或投謁朱門呈身綺席膏
蓬鬢以獻笑倚漆管以救饑輕薄之子交口訾
警以為粉黛山人笄幃乞士吁其可傷也已新
安范眉生携從妹劬淑詩草就正于余劬淑之
詩抒情託興不出乎夫妻母子房櫳門屏之間
骨肉慮嘆門戶綢繆喜則真喜悲則真悲無事
於寵柳嬌花裁雲縷月信乎其為淑姬靜女之
詩也揚子曰女惡華丹之亂窈窕也華丹之飾
揚子猶惡之况于易頭借面并其華丹而失之
乎舉世之女子相與揄長袂衣方空畫愁眉簪
墮髻揚眉頓暖嫵細視有一人焉青衫裙布
縞衣綦巾離立于其中為女伴者靡不笑而唾
之而其入亦將顧影羞澁刺促而無以自置世
有揚子惡華丹而思窈窕其將取諸彼乎取諸
此乎余三嘆劬淑之詩以為居今之世疏淪其
眉目無忘閨門之本色庶幾可以風世也其將
以余為老不曉事申申
而詈余余既已知之矣

睡燕

寂寞梨花夜色低春風輕拂畫梁西甘隨蝶夢穿花宿
懶和鶻聲帶月啼織水失梭萍影合破烟無剪柳絲迷
風簾喚醒輕輕語猶話華胥啄落泥

三月十九日偶成

春已闌刪蝶意踈草間微瓣雨沾初蛛絲為巧終成繫
螢火求輝應望餘兩月鶯花慚五柳十年心事夢三閭
畫堂香艷憑何處落盡紅衣燕子居

夜坐

夏雨涼生夜深庭人未眠濕螢飛不起點點墜堦前

吳蠶曲

絲完蠶已死蠶死竟留絲辛苦知無悔留絲為阿誰

旅居

殘燈明滅亂蟲啼展轉鄉心月漸低夢對家人纔欲語
鷄聲依舊到窓西

陳維崧婦人集范滿珠休寧人范眉生妹詩才與兄相稱述母一詩曰獨眠不禁冷風呼摧落梨花滿地鋪可奈壻亡留女在那堪兒死更孫無枕前有夢誰人伴燈下無言已淚枯不是彼蒼昏昧久如何伯道暮年孤詩語絕痛又旅夜絕句云云淒淒楚楚可念也詩名繡餘草

劉氏

湖南善化縣人適諸生和鼎二十四歲而寡詩

見長沙府志

長沙府志彭氏廩生和紹中妻善化人年二十八夫亡家貧艱貞矢志事翁姑生塋盡禮年五十九卒教子鼎入庠旋沒遺媳劉氏通吟咏年二十四而寡遂絕筆不事詞章惟奉姑撫孤為念姑病典衣鬻藥惟恐姑知現年五十四歲

卽事

一葉隨風送嫩涼數行雁字帶斜陽採菱渡口歸來晚
閒步中庭月似霜

陳玉岑

江蘇山陽縣人許志進之繼配也無子守節五十餘卒著有來鳳樓集

鮒魚

珍味誇食單江鮒得新取潮信起春溇承筐貫之柳肉
 芝連活玉洗鱗忍觸手烹飪戒厨娘芳辛滑以滌食指
 搖借箸雋味適可口絕勝松江鱸合佐酒盈斗魚箋寫
 新句清興發尊占落花啼鳥中春盡夏方首江鄉魚笋
 樂僕射何如酒先生恥家食願得操魚留三山風月笛
 盡醉舷堪扣長歌漁父詞裙布偕箕帚

南樓對月和外

一年能幾度永夜此孤圓清露無聲下踈星幾箇懸樓
 臺瑩似水花樹靜含烟淪茗焚香坐三更人不眠

許志進原作天鏡掛簾鈎凝輝爛不收團團當首
 夏皎潔豈中秋蟾兔青冥小山河瀨氣浮丹心將

白髮幽興
 寄南樓

桂花

移植傍朱樓繁香一院收托根從皓月結子在中秋金
 粟前身影瑤林幾樹儔清飈薦蕭爽仙館共深幽

許志進和韵詩金粟滿枝頭香多浩不收四時全
 得月一樹最宜秋落實寧論晚凌霜孰與儔自緣
 辛辣性老
 向小山幽

白雁

驚看白雁到江城皓月光含玉羽清行踏雪泥留爪跡
 來從霜積帶寒聲尺書遠繫雲霄濶飛白橫披點畫輕
 良夜叫羣天拍水鷄鳴昧旦迴關情

庭花四首

花箭比葉長微風裊露香同心不無意為植向蘭房蘭

明妝揜翠袖亭亭漾清泚來摘浣晴霞連房數青子蓮

雪艷花田質人間占晚妝夢回羅幌月嗅得枕棱香茉莉

名重紫微垣花映絲綸閣相對兩忘言紅芳自開落紫微

題管夫人畫蘇蕙織錦圖

一寸璇璣蕙子心帝鄉天遠恨魚沉國風小雅鴛機字

為寄連波是賞音

愁思封將錦字圖管姬曾是憶君梧封侯自屬英雄事

倘憶閨中萊婦無

許志進和韵詩縱橫錦字三千首好解還超朱淑真寫入蒼梧羈客恨靈心惟讓管夫人論才得似仲姬多記和春宵畫竹歌君是前身蘇蕙子嫁將松雪勝連波

飼蠶詞

博得春閨兩月忙幽風七月第三章擬將一匹天孫錦

製作金黃公子裳

重帷篝火護蠶寒晝永慵多午夢酣睡起裁詩先匿笑

綠窓人自嬾於蠶

六食三眠困欲舒披沙布葉按蠶書何當瑞草分園客

冰繭成來甕盎如

先蠶鄭重說西陵製就羅紈入市輕周禮夏書閒檢閱

從君幸作女書生

纍纍犢角報蠶成 預設添梯約鎖星 更為右軍儲繭紙

茂林修竹寫蘭亭

愛看蠶蛾作對飛 抽思敢擬織璇璣 好施山甫經綸手

重補虞廷藻繡衣

許志進和韻詩春閨也復事蠶忙 拂曉傾筐分女
桑簇簇娟蠕纔食葉焚香先拜馬頭娘 竟日柔桑
飼一簞深宵斗帳護餘寒綠窓女伴多私思不是
梳頭不肯看幾夜留燈照獨眠蠶房齋禁太常偏
軒渠借問秦淮海箇出蠶書第幾篇九日眠餘困
未醒莫教擲葉怕蠶驚扶床笑語嬉嬌女繭虎簪
頭待繭成七襄雲錦自天孫蘇蕙璇璣且漫論準
備纈車看浴繭元黃黼黻出三盆曾染山龍上赭
袍經綸事業問蠶纈仲山袞
職吾何補此事由來讓汝曹

方寧

安徽桐城縣人適孫蓋臣嫁甫數月夫亡殉節

著有又清閣遺稿

方孺又清閣傳略姪女又清閣名寧四弟備嘗
女也生而穎慧多病未嘗出閨閣喜流覽詩史
每聞里閨間有節義事則亟稱羨之不去口其
天性然也居常侍庭除即景撫懷間發為歌咏
至年踰二十始贅孫氏子蓋臣為婿孫故與吾
家世好博聞彊記至行醇篤女既香遵兩氏儀
範不以窶故失事人禮親操作愉婉恭順唯謹
越數月婿歸省親婿家邑北麻篤山去郭門一
舍及歸病作女粥簪釵購參朮藥餌覓人齋送
不絕已有瘳矣忽一旦訃至女聞奔哭數十里
不輟聲哀感行路女自結禱後閨百餘日猶未
入孫門也至是麻衣衰絰哭泣廟見自始嫜以
下憐而哀之無不淹泣失聲者女既親含襚畢
撫棺啣臂誓不欲生時方孕婿臨歿倦倦以遺

腹為言乃茹痛復大歸吾弟所孕僅八月產一
 女未幾歿女呼天大慟曰吾今復何望哉吾所
 以遲遲未即從夫子地下者以孕孕而女復
 不存吾已矣復何望哉先是女屢哭死皆救甦
 因泣語父母辭訣勿復救作絕命詞數首號哭
 屏食飲十餘日以死死前一夕預服襖衣問夜
 何其質明端坐誦佛號而逝吾弟
 如其言從壻合葬於其家山之陽
 方陪翁又清閣遺稿序略吾于女孫寧之得死
 所也而後感天意之成也女孫寧為吾兒瑋
 女生而穎異稍長讀吾祖姑節婦清芬閣集愛
 之時時不釋手吾鄉有高氏女未嫁而夫亡矢
 志不字女孫聞之嘉嘆不已喜其得吾川真姑
 遺風豈非其情性之得于天者乎贅壻孫蓋臣
 甫數月蓋臣以省親病于麻山女聞訃哭死奔
 喪因蓋臣遺言願存遺腹一脉力勸忍死撫孤
 視死猶生視生猶死豈非其志之得於天者乎
 孕僅八月產女日夕泣涕願從夫地下未匝月
 女亡女孫告父母曰分定死矣切勿復救因作
 絕命詞絕粒以死合夫葬于麻山麓由是觀之

性之重節義者天也嫁數月而夫亡者天也生
 女不育卒能遂其矢死之志者皆天也非天之
 成之也而能若是乎學詩亦未久而能抒寫其
 志之所在語甚悽惋命瑋錄而存之使世之君
 子憐其志而已

秋夜

片片輕雲入夜流百蟲聲裏一燈幽
 牕前落葉知多少

殘月蒼蒼山自秋

初夏

微風陣陣透牕紗竹影橫穿日影斜
 倦鳥飛還深樹裏

雙雙蝴蝶遶庭花

夜坐

遠寺鐘鳴和雁哀
斷腸聲逐淚千回
蕭蕭風透牕櫺響
疑是孤魂入夜來

沈蒞紉

字蕙貞江蘇吳江縣人沈高陵之次女也年十二卽能吟咏適諸生吳君梅吳早卒矢志栢舟臨歿謂其弟浣桐曰頃得詩二句病多未得專醫肺瘦盡何須更論腰惜遺稿散失浣桐方爲搜輯僅得百分之一二焉

春暮

重簾不捲澹房寒
誦罷楞伽獨倚闌
桃謝柳飛三月暮
雨迎風送一春殘
鶯梭織就愁千縷
燕剪裁成恨百端
錦片韶華塵土看
茶娘慰藉勸加餐

池塘柳影

盈盈弱態入溪煙
濯濯春姿上遠天
翻破碧濤常自舞
攪空寒夢不成眠
魚梭擲去千絲亂
水馬行來一縷牽
陶令門前零落盡
幾枝搖曳野塘邊

月華裙

輕薄冰綃六幅寬
空階閑步玉珊珊
素娥應是憐孤寂
百道雲華護廣寒

帙中得亡姊遺箋

倡和難尋幾斷腸丹鉛留影黛留香短箋題句今猶在
欲讀先揮淚數行

詠菊

洛下群葩媚艷陽都將紅紫鬪時妝自憐生性甘寥落
直待秋深一傲霜

楊涓

字秋碧浙江會稽縣人適茂才謝某

題冬景畫

橫斜梅影拂窓紗雲去峰頭露月華不是群真遙獻瑞
碧天豈肯散瓊花

圖繪寶鑑楊涓字碧秋會稽人謝茂才之室不惟
能詩善畫其貞烈當炳炤青史畫冬景並題云云

曾淨蓮

湖南新化縣人適順天秀才趙德謹賦性安閒
幼嗜筆墨十歲卽能吟咏少寡冰霜自矢日惟
閉戶焚香習誦金經中年雅好談元頗有霞舉
之想

立秋日

時寄居燕京

鳴蟬枝上報新秋午夢驚回故里遊血淚殘啼桐葉落
墨痕書遍雁行愁萋萋衰草連雲淡點點殘花帶雨流
晚霽憑欄無限意鄉懷秋興兩悠悠

登城子山

萬山山上白雲端雨霽登臨作大觀舉首乍驚紅日近
凝眸靜看綠峰攢飄然身寄烟霞外渺爾神遊宇宙寬
海島蓬瀛何處覓好居此地躡飛鸞

咏白桃花

潔素冰華占上林淡粧如洗脫紅塵肯隨羣艷爭顏色
只仰梅花作比隣

諸餘

字耀霜江蘇無錫縣人進士保宥之女適戴叅
議子鉞早寡著有冰心集

賦謝邑令莊君

衰朽何堪動大賢孀閨未可姓名傳侍姑有媿承歡禮
教子空懷畫荻篇兩字文章吾豈敢百年窮苦命應然
使君藻鑑衡今古冰壺增光感二天

絕句

喪父喪夫兼喪子思姑思母更思鄉鸞影已分羞對鏡
月光雖好莫憑欄

長泰縣志諸氏名餘字耀霜江南無錫進士保宥
女也叅議戴權淮關為子鉞擇配焉鉞善文諸工
于詩十七賦于歸六載而稱未亡其苦節貞心悲
愁鬱抑悉于詩發之著有冰心集如絕句云云蓋
可想見其實也晚年邑令莊君欲贈詩氏賦謝
云云令先後相繼請旌不果行卒年八十有三

衛琴娘

浙江天台縣人

題壁

衣片鞋帮半委泥千辛萬苦有誰知
幾回僻處低頭看
獨自傷悲獨自啼

目斷天台旅雁長青山綠水杳茫茫
不知憔悴中途死
魂夢何時返故鄉

丹徒縣志順治三年十一月甘露寺有一婦人死於楊公祠內僧啟其尸見壁上炭書字數行云妾赤城弱質也姓衛小字琴娘子歸三月忽遭離亂匝地鼓鼙擁之北上歷吳渡淮欲死無所幸以琵琶擊之得脫虎口潛逃破面毀形蒙垢廢跡晝乞窮途夜伏青草吞聲背泣惟恐人知偶登北固江

山滿目不覺涕零
因為短吟二首

吳氏

安徽桐城縣人事詳詩注

詠史

六貴同朝激虎彪橫江勒馬下西州
銀鎗酒市春雙屨
玉屨蓮臺月半鈎趙鬼西京諳漢賦
阿兄東閣壓通侯
誰知講武旄頭入芳樂笳聲碧麝秋

右南齊

同泰齋中拜佛囉壽陽千騎渡江波
金甌突向金甌缺
蔬絕空陳鷄子多五月誰勤君父難
七官先反弟兄戈
江淮廢後襄陽促秋草臺成放橐駝

右南梁

臨春閣上萬花妍寶帳朱簾裊蕙烟鞦韆鼓飛衝朱雀路
軍書壓損繡牀邊嫦娥入月昏銀鏡狎客還家碎錦牋

賸有景陽宮畔井胭脂春水咽殘絃

古南陳

江南一劍捲秋霜半壁山河入雒陽百尺樓空蓮葉碎

翠微亭冷鳥聲荒臨城悽愴填宮曲辭廟倉皇聽教坊

日夕淚痕誰洗面錦書封恨報紅粧

右南唐

觚賸桐城吳氏年二十五而寡以其所居有棲梧閣世遂稱為棲梧閣吳氏秉性高潔好讀歷代群史而艷詞小說屏絕弗觀今聞其年六旬有奇已屆梳雪之辰尚勤操觚之業著有吟咏蒼古悲涼無脂粉氣若置之朱鳥集中又為閨閣另開一章面矣余於番禺宰姚公官署得金陵懷古詩八章錄其四而存之

楊淑貞

字端一四川金堂縣人廣西潯州知府正輔之

女適六安州諸生閻鑒著有詩集一卷

聞鴉喧憶親述懷

一鳥樹頭集羣鳥共喧呼老者似愛憐雛者如持扶老

雛同依依孝哉至性俱物情尚如此嗟我何其殊憶我

將字日親悲淚欲枯一旦遠分離千里阻程途荒城魚

雁杳生我却如無恨我不為男背親來事姑十五年瞬

耳親容今何如親容日益衰親年日加諸親容與親年

追思忽嗟吁感此物爭鳴誠哉不如鳥三復蓼莪詩嘆

息欲廢書

悼亡

琪花玉樹陡凋謝黯淡月影空庭瀉閨闈悲啼作杜鵑
麻衣紅血暗沾藉細訴衷腸總帳側君其聽諸莫悲咤
在昔我父與我翁同官誼好結姻婭重爾黔婁德冠羣
十六而笄將身嫁未幾命駕一時歸離親遠去心如炙
左胸右末奉高堂蒼烟白雲思親舍花時滌硯共章句
晴日倩婢勤桑柘轉眼渾似一夢中計今十九度春夏
去冬君病支匡牀烹藥進餐幾會暇朝夕辨香焚金鼎
苦厄繞纏祈神赦菊泉空勞酈縣求人壽難向錢鏗借

時過寒食竟長去哀哉一代儒雅罷歷歷長城哭將頽
巖巖巨石身幾化樓頭紫簫常共吹一旦鸞背君先跨
此去逍遙應無憂如何彌留晴光射似多牽懷口噤嚙
女媧愁難補天罅平時常慨庸女流水性東西殊堪怕
自古美玉比閨人在人各重無瑕價我心惟君素所知
不二靡他休疑訝中流栢舟吟誦久當年共美我其亞
鬢髻蒿簪畢生粧翠羽明珠自茲卸眉鬢永罷臨菱花
裙衫不重薰蘭麝更何心情玩芳菲寡鵠甘受黃鶯罵
蕭條戶窓風披帷冷寂園亭苔生榭見君遺書盈鄴架
課兒丸熊勤中夜兒得成名事業興良人瞑目九泉下

病起東井桐汪大姊

翠冷黃添逐病容
修眉怯掃黛螺封
簾痕輕拭流波膩
幔影閒垂曲檻重
五夜燒燈挑荳蔻
三秋覽鏡減芙蓉
披衣小展裁桐葉
撩亂吟情四壁蛩

秋夜

紗窓月透影朦朧
丹桂香飄曲院風
滿耳蛩聲秋唧唧
玉堦寒露冷梧桐

春日

輕寒款款逼窓紗
日影穿簾燕子斜
底事小園春未減
一枝晴放碧桃花

吳絲

字黃絹安徽合肥縣人總兵吳英女適吳縣欽
牧中年而寡二子先卒依子婿沈佳忠居吳縣
木竇鎮卒年八十二著有集

過鶯脰湖

風光淡沲晚涼天
遙望漁家夕照邊
傍岸綠陰藏釣艇
一竿秋水半湖烟

詠梅

月上疎枝影自工
香浮綉幙半因風
春光滿目皆生意
凡卉萋萋不與同

許元淳

字韞輝浙江仁和县人適王文學映奎結褵甫數月而寡著有韞輝樓吟稿

秋閨有感

風飄黃葉滿庭飛寂寞深閨晝掩扉鴻雁不傳泉下信空勞刀尺製寒衣

李蒞

字天章江蘇崑山縣人明經葉崙生之室也

再送真師

遠送已云再蒲帆復此揚禪心無去住塵世有炎涼足

遍下峯頂身惟一鉢囊憑高覽天外邈矣豈能量

中庭早梅

庭樹垂芳凍欲消新鶯學語未全調曉烟淡護寒方透夜月深籠暖尚遙笛裏驚飛忽片片樓中清夢漸迢迢殘香不逐風吹去猶自甜微伴寂寥

寒食掃夫子厝宮

驚心烽火徹雲霄移厝郊原恨自饒荏苒東風三月到淒涼南陌一盃澆花和淚落如飛雨江帶愁深正晚潮似有魂來招未得啼鴉歷亂促歸橈

秋夕

指芳集 卷一 三
堦下淒淒日窓前
嫋嫋風晚來
聞絡緯啼遍
百花叢

春歸懷長女

幾聲杜宇喚春歸
無數楊花上下飛
聞道昭陽早濕地
不知曾否試羅衣

暮春

如豆青梅葉底垂
輕寒微雨暮春時
東風不共鶯聲歇
落盡殘紅猶自吹

斷酒

莫爲愁懷藉酒開
須知萬感醉時來
醒中悟得空王理
世上悲歡事事灰

郝湘娥

直隸保定縣人
容色麗娟
年十一鬻於本地巨族竇眉生家
能詩弈又善繪花草
人物遂爲其子鴻所寵
尋有山陰崔仲平者與京中大僚厚而保定太守爲崔戚屬竇以太守故宴之出郝相見及崔入京大僚欲納妾崔以郝告竇不允扳入盜情下獄自縊郝在家亦於是日自縊死
崔後爲竇生批頰暴死

江南採蓮曲

綠鬢紅裙映水鮮
荷香十里盪輕船
背姑撐入花深處

暗自拋蓮約少年

采蓮乳婦小花香羅袖新裁半臂長為羨灘頭交頸睡
戲將荷葉罩鴛鴦

十五吳娃慣弄潮隔花回首向郎招來時不用撐船訪
門對垂楊靠水橋

荷花如臉葉如裳日向南湖棹小航梳得雲窩光似鏡
更將綠小照新粧

絕命詞

一婦何曾事二天今朝遘死赴黃泉願為厲鬼將冤報
豈向人間化杜鵑

圖繪寶鑑郝湘娥保定人修眉秀髮姿容媚麗年
十一鬻于本地巨族竇眉生家十六歲能詩善弈
又工畫花草人物後竇被人扳入盜情自縊于獄
湘娥亦于是日縊死於家賦絕命詞四首僅錄其
一其詞
云云

林 錡

字芳榮福建侯官縣人林太史澍蕃之妹適奉

天少尹陳治滋孫元煒夫亡殉節自焚其所著
詩故失傳

林喬蔭仲妹行畧妹名錡字芳榮其夫陳元煒
字有美以乾隆四十一年三月二十二日丑時
卒吾妹殉節為五月初二日酉時年三十其生
也吾父方官浙之山陰令二年而罷官歸又三
年而吾父歿時吾叔父先卒吾方九歲弟澍蕃
四歲吾祖母廖太安人悲痛無聊吾母鄭太安

人常令妹嬉戲左右以娛朝夕廖太安人尤隣
愛之廖太安人本陳氏女也為德泉先生女弟
先生歸自奉天時往來吾家謂太安人欲申婚
姻為永好太安人撫妹而言曰此女可先生詳
視而異之曰吾諸孫年多與相若然非此女
匹也四男之子元煒慧而慤吾所愛可以配之
時吾父喪甫踰期明年免喪遂定聘焉乾隆三
十二年喪甫踰期明年免喪遂定聘焉乾隆三
事翁及庶姑惟謹即叔二人小姑四人皆依若
所生然次年而翁官四川家負官錢妹盡斥奩
具鬻從婢以完逋自是荆釵布服井臼操作之
事皆身親之未二年而翁卒於官多難之餘與
其二弟飢驅走四方妹以一人拮据補苴蓋自
歸陳氏至於死凡十年未嘗享一日之安也前
歲其翁之喪始歸妹持重服迎郊外明年其郎
叔先後畢娶能自立家事畧有成矣廖太安人
謂喬蔭曰汝妹今當稍安逸得時歸寧幸甚喬
蔭亦以為然嗚呼豈意其至是耶有美故聰敏
能文章以為然嗚呼豈意其至是耶有美故聰敏
春自建寧歸應試復黜遂病病不十日亡矣妹

撫尸一慟數日不進漿水吾母悲亦不食乃勉
進數數先成服之日藏羅帕於懷為人所覺以
告吾母急索之哭而投諸地哭不絕吾叔伯兄
弟往唁者吾曰汝喪事略畢可歸吾家在老人
膝下亦可稍解悲懷妹曰吾今終不復歸矣固
知其必死也五月初二日聞陳家有人來曰噫
嘻吾妹死矣問之信趨往哭之面如生目瞑若
熟睡時也其纒以白布帶窺其意以前所懷之
羅帕非服中所宜用故易之以
此雖死而不苟也嗚呼痛哉

句

踈簾人靜燕來窺

何其瑩

字秋碧所適及里居未悉

孫貞媛詩

我亦誓完貞孤危一命輕冰霜堅勵節花月淡忘情處
困辭金屋遊仙慕玉京細評扶鶴語自愧未捐生

次韻題明妃圖

情知殺壽主恩稠感遇分明死節秋忍抱琵琶辭故國
項王贏得美人頭

扈氏

直隸北平人歸福建鄧某

衣帶遺詩

征塵萬里伴夫君冷落深閨哭不聞薄命蛾眉終見妬
一縑傳送到燕雲

飛燕伯勞此日分斷腸無計暗消魂願從野蝶依青草
攜手雙雙到鬼門

福建通志扈氏北平人年十七歸鄧宦某為妾嫡
妬閉氏幽室數年不得見鄧沒嫡乃出之氏奠柩
前自經死衣帶
帶有詩云云

徐鍾璧

字賓姪江蘇婁縣人廩生徐允貞之女適王豫
瀍三月而寡矢志守節能詩文不肯以翰墨自
炫故流傳甚少

江南通志王豫瀍妻徐氏婁縣人康熙三十七
年奉旨旌表
徐懷祖亡妹徐節婦行畧舍妹名鍾璧字賓姪
先王父聖期公女孫先考麗冲公長女也年十

九子歸王子量遠名豫灑姑杜夫人寡居孝敬
 兼至婚未匝月會量遠家疫作杜夫人相率避
 於鄉月餘先君乃招量遠寒齋課文半月疾作
 迎姑共為調視越七日率妹痛哭欲赴井祖等
 力阻之回視含殮勺飲不入口至七日欲訣別
 從死先君子家慈與樵夫人百方勸慰乃進漿
 糜已而姑遷往壻家先君子援大歸義取以歸
 日與一婢刺繡紡績雖冰天雪夕必至夜分而
 後即安時遣人問遺姑不失子婦禮祖兄弟各
 以謀生走四方左右承權解憂者惟妹一人而
 已迨四十九歲杜夫人卒於壻家妹強病往含
 殮哭泣盡哀明年葬姑舅塋時方沍寒執紼之
 際風回而雪霽舉肴之時水泮而土解人以爲
 孝感所致云妹自姑歿後未半載又遭先君子
 變復竭歷稱貸佐祖兄弟喪葬之費而且三年
 以內孺慕不衰祖等有厚幸焉妹幼時未嘗讀
 書而頗好閱覽沉思夙慧能詩文然終不敢自
 炫也苦節三十二年例得旌祖兄弟諸同學
 顓當事為之轉請五十
 二歲奉 俞旨建坊云

憶姑

風雪連宵冷不支藥爐茶竈鎮相隨老姑可得猶強飯
 相見無由苦夢思

朱氏

浙江海寧州庠生周靖遠妻也靖遠卒氏絕粒
 十餘日不死諸母強之乃曰以待夫墓嘗作哀
 詞以見志墓後別老親仍絕粒而殞詩見拙齋

集附

哀詞

身雖未死心先逝無奈偷生未葬時血淚千行誰得拭

夢魂先遣報君知

黃汝蕙

字僊佩號蘭舟江蘇吳縣人善丹青適顧學著

有延綠閣詩稿

丁鉉延綠閣詩稿序略余表姪婦黃孺人汝蕙
 字僊佩為蓄齋公孫女少承家訓潛心好學冥
 搜雜誦爐箠不休家人以女博士日之及笄適
 吾表姪顧頤亭黃本素封孺人于歸後淡泊自
 甘後頤亭偕諸父葬大父頤亭為長孫倍費心
 力得疾而亡孺人年三十許痛絕至再既念太
 姑及本生舅姑皆在養繞膝投懷者七人仰事
 俯蓄惟未亡人是賴于是一茹茶飲藥啣哀操作
 奉高堂教子女以至喪祭大事皆一身十指任
 之性喜吟咏有各體詩百餘篇寄托深遠其音
 哀以思其詞典而則惟雅不欲以詩名故存者
 絕少至是岱峰亦渠諸表姪孫手錄成帙乞序

于余用即其詩以敘其生平之賢
 孝用傳其人然詩特其緒餘而已
 顧曰乾先嫂黃孺人行實略嫂姓黃氏諱汝蕙
 字僊佩吳縣人幼而警敏姻家訓年二十于歸
 吾兄頤庭公時先王母黃太安人在堂嫂為冢
 孫婦克盡婦職烹飪之事必躬親調味而後進
 雍正辛亥九月兄與諸父經理先王父葬事盛
 暑往來赤日中心力畢瘁事竣積勞並發遂致
 不諱嫂哀毀骨立三年哭不輟聲是時諸孤熒
 弱嫂為延名師嚴課讀自勤女紅以佐修脯有
 不給即脫簪珥典衣襦無吝色嫂聰慧好讀書
 博覽子史集尤熟精文選每歷論古今治亂之
 際忠臣孝子節婦烈女之行輒歎感慨蓋讀
 書明大義不僅雕華是尚也嘗記癸亥新正乾
 北上拜別會天雨雪蒙贈一律云六出寒光照
 眼明小郎何事獨長征橫雲漠漠吳江濶飛絮
 茫茫燕樹平橋號盡情誰折柳鳥言泥滑客偏
 行他年駟馬高車返老婦無嫌匍匐迎蓋乾五
 歲時先君以寢疾命兄嫂撫之飲食教誨無異
 諸子故殷勤期望見於詩篇何期是年夏即溘

焉長逝而臨別之贈言竟為永訣之遺訓哀哉
嫂兼善丹青仿徐熹黃荃筆意點染生動嗚呼
嫂素慕曹大家其閫範可
以無媿而才藝亦不讓也

冬日雅園卽事

雅園今作野小亭尙可望纍石見山翠景色何清蒼朔
風來庭際落葉鋪池塘松柏經冬秀茶梅先春芳瑞花
飛六出隨風轉翱翔呼婢掃庭雪烹茗還共嘗自得澹
中趣何必傾壺觴所以古之人心齋學坐忘

賦得惜花春起早

春來開徧枝頭萼淺紫生紅鋪院落鶯聲帶嫩露中圓
燕嘴留痕香處索半鈎殘月入窗來一片清光映鏡臺

睡起無心理雲鬢捲簾先自看花開

綠萼梅自題畫扇

貌得寒梅迥出塵僊家萼綠是前身半舒縞袂原非俗
微帶青顰更可人疎影亭亭含冷艷幽姿淡淡見清真
須知筆底無浮艷不負江南第一春

送春

柳絮穿簾撲素衣林園曉望綠霏微堪憐花底尋香蝶
猶戀殘紅繞樹飛

程慰良

字弱藻江蘇嘉定縣人徵士程宗傳之四女適

錢塘秀才汪繩祖爲繼室期年而寡遺腹一女
厲志守節著有吾土軒稿

玉蘭花歌爲兒離照作

東風取次吹芳妍梅花以後誰爲先
海棠雖艷桃李俗未若蘭溪之產皎皎玉樹臨風前
予家小園春樹裏毛斑初脫熙春天
一株挺扶不盈大精神奮發墻東偏
主人事冗未延賞排空玉蘂招群仙
韶華浩蕩才綺靡晴倚離闌曉初起
寒光射日暖氣蒸素面朝天碧雲咫尺踏
破蒼苔繞砌看手植何時今有美當前
清麗樂少年轉瞬崇高望伊始生香不斷意趣賒
日對瓊枝啜茗芽若個有田皆種玉從今無筆不生花

九日寄恬菴四妹

西風蕭瑟下林臯冷氣徐侵薜荔袍
別後半年仍抱病愁來九日罷登高
黃花滿徑添吟興紫蟹堆盤憶酒豪
料得他鄉逢此景也應彩筆記題糕

送聽彛三叔之黔陽叔舅藩署

放舟江上正斜陽遙指南天道路長
新到漫言居嫂禮問安須代致翁旁
時舅在叔舅署迷漫烟水颿千幅掩映春旗
柳幾行此去壯遊真不惡蠻花犴鳥也迎裝

秧針

穀布膏腴浸灌深嫩秧簇簇利如針陌旁柳線穿難定
水面羅紋刺不禁碧毯縫成舒待日僧衣樣好製關心
詩歌寶穎鋒先銳記取懷新粟里吟

楊柳詞和四弟玉樵

幾日春光到柳條臨流細學楚宮腰晴湖十里桃花路
遠送鶯聲過六橋

不隨紅紫鬪芳菲搖曳鷗沙傍釣磯猶有漢宮標格在
彎環爭舞鬱金衣

無邊翠色楚江頭葉葉絲絲總是愁寄語凝粧遊子婦
春來莫上最高樓

蚤是輕寒乍暖天那堪三起更三眠阿誰金勒堤邊過
拗得長條作馬鞭

句

陌旁柳線穿難定水面羅紋刺不禁

事從悟後言皆物詩到工時心更虛

隨園詩話杭州汪秋卿夫人程慰良詠秧針有句
云云又有句云云真學者之言

魯氏

號月霞字里未詳適徽州程生而寡

句

觸我朱欄三日恨費他青帝一春功

隨園詩話金陵女徐氏適桐城張某夫久客不歸
 寄詩云殘漏已催明月盡五更如度五重關又有
 魯月霞者嫁徽邑程生而寡有掃花詩云云陳淑
 蘭讀兩詩而慕之題其集云吟來恍入斑昭座恨

我選生
 二十年

